

U BUKÉTI PA SÜMBI

 Bo uswe tukāli ukwinamisya imitu gyitu ku lwiputo, une ngulonda ukubala gamo mwa Lisyu lya Kyala. Une akabalilo kosa nīganile ukubala i Lisyu Lyake; panongwa yakuti amasyu gangu gisakutoligwa, agēne ga mündu, loli i Lisyu Lyake likabagila ukutoligwa. Kangi kwa umwe mwe mukukyunga utusimbe, na fyōsa bo ifyo, unko uswe tubale ukufuma kwa Matai untu gwa 14, ikilo iki, ukwanda ni linandi lya 22.

Kangi ukufuma pala Yeso ikufimobilisa abafundigwa bâke ukwitoga mu sitima, nukutala pankyenpa mwene ukubuka ku lubafu ulungi, akabalilo kâko umwene abalyaniága ikilundilo.

Kangi akabalilo kâko umwene abalyenie ikilundilo, umwene alinkubuka nkyâmba ukwakwipúta: kangi akabalilo kâko... amayolo gâlisile, umwene âli pamwene.

Lôli i sitima yâli lilino pakati pa sâmbi, yikuyuganisigwa na mayiga: namanga umbelo gwâlwâga.

Kangi mbukêtésyo bwa kina ubwa nkilo Yeso alinkubûka ku bêne, ikwenda pamwanya pa sâmbi.

Kangi akabalilo kâko a bafundigwa bâlimbwéne umwene ikwenda pamwanya pa sâmbi, abène balinkupâsyâ, bikuyoba, Ikyene kyo kisyuka; kangi abène balinkukúta panongwa ya lutende.

Lôli nukatalula Yeso alinkuyoba ku bêne, alinkuti, Yaga nu bukyèle ubununu; ikyene yo Une; komma ukupasya.

² Unko uswe twinamisye imitu gyitu lilino panongwa ya lwiputo. Bo imitu ni ndumbula syitu syinamisigwe pankyenpa Kyâla, ngimba kulipo ukufumbwa nkiyumba, ikilo iki, ukwakuti ugwe kulonda kumanyikigwa na Kyâla, ukwisila mu kyînusya amaboko gînu, nukukumbukiligwa mu lwiputo? U Ntwa alikêtâga pa umwe, ayége ni kisa pa uswe.

³ Tata gwitu Gwakumwanya, uswe tukwisa lilino mu Kuyapo Kwako, mu njila na mu Ngamu ya Ntwa Yeso. Bo tumênye, nulusisimikisyo ulusayigwa, ukuti Umwène âtufingile uswe, linga uswe “tukusuma kilikyosa” mu Ngamu Yake, ukuti Ugwe ubagile ukutupaga ikyene kuli uswe. Uswe tukupâlisya fiyo panongwa ya iki. Amasyu gikutoligwa ukulingânia mûmo uswe tukwipilikila ukufwana ni kyène, nu lusisimikisyo ulu uswe tuli nalo, ukuti Ugwe kutupilikisyus uswe itolo lilino.

⁴ Ugwe kugabona amaboko gala, Ntwa. Ugwe umēnye iki abēne bafumbilwe. Ugwe gwe Kyāla mmanya-fyōsa, mwene-maka, nsitampaka, kangi uswe tumēnye Ugwe umēnye indumbula sya bāndu. Ugwe gwāménye aminogono gītu. Pópe bo uswe tukāli tukāpeligwémo siku, Ugwe gwāménye ilinogono liliyosa ili uswe twātigi tusayége nalyo, namanga Ugwe gwe nsitampaka.

⁵ Kangi uswe tukusuma, Ntwa, pa sala iyi, bo ifinyonywo fytu fikufikila kwa Ugwe, kētésya pāsi ukufuma ku Mwanya, Ntwa, nukwega ifyākusúma fytu ku ndumbula Yako Gwimene, Ntwa, nukutwāmūla uswe ukufwana nu bukábi Bwāko mu Lwīmiko. Tupaga uswe ikinyonywo kya ndumbula yitu, bo tukusūbila ukuti ikyene kyo bwigane Bwāko Bwākyála. Kangi uswe tumenye ukuti ubwene bo bwikyéle Bwāko ubununu ukubomba ubwigane Bwāko.

⁶ Tupaga uswe ukonenela-panja ukukulumba ukwa Kuyápo Kwāko, ikilo iki, kangi Ntwa. Bumbulusyaga ababíne. Pokágá abayōnge, basyūsyága bala aba bafwile mbutulwanóngwa ni ngilanio, nukubatwala abene ku Bumi ubupya, ikilo iki. Uswe tulinketa Yeso. Uswe tukusuma ikyene mu Ngamu Yake. Ameni.

⁷ Umwe mulitugasya. Uswe tusulumenie ukuti uswe tukabagila ukwingisyá abandu, panongwa ya buyo bwa bwítūgásye. Loli, ukufuma pa kilo kyākwánda, abene bikuti abene bāfimbilisigwágá ukugómósya ifilundilo ifikulumba ifya bandu, popapo uswe tusulumenie fiyo panongwa ya ikyo. Kangi Ngundwe Grant itolo akāfikilépo ukukyéga ikyumba ikinine, pamó, uku... Une ngusūbila ikyene ko ku kililo kūko umwene isakugütilágá ikiyabo iki. Umpala, umpala nkundwe umwīsyúgu âlindálüsísyé une linga une nābagíle ukukitendeka iki kindu kyapakyinja kilikyōsa, ukugomokela ku Dallas, ku kipanga kyake. Ukukoleligwa ikukulumba bo uko, mu sala iyi, akabalilo kāko ififígo fikwigálá nakalinga fiyo, kangi polelo u nnyāmbálá yula ikulönda une ukugomokela kangi nukukipela ikyene kindu kyapakyinja kilikyōsa, ubwínáke. Une ngupalisyá ikyo.

⁸ Une nali nakabalilo ka bulilanisi na bene ulubunju ulu, na Nkundwe Gordon Lindsay na bingi ba bēne. Nkundwe Pearry Green, uyu yo nhombi gwa lukomano ulu lukwisa pasi ku Beaumont, itugesye kunyuma kwa une muno ikilo iki. Kangi bīngi, abinitú, Nkundwe Don nu nkasi gwake. Uswe tuli basangalufu fiyo ukuya nabo abene apa. U Ntwa abasaye abēne.

⁹ Lilino, ikilo iki, itolo... Une nagelaga ukutendeka i Ndumi syāngu itolo ukuya mbepe mūmo isyéne syābagíle ukuya, ukuti yópe nu mwāna abagíle ukusipilikísyá isyéne.

¹⁰ Kilabo pamusi lo lukomano lwa kusōka panja, kangi une nanyonywaga umwe āngáli mwesa ukwisa panja.

¹¹ Lilino linga umwe muli ni ngomano ku kipanga kyīnu mwibene, fiki, umwe—umwe syāla pāpo umwe muli—kūko umwe mubikīgwe. Uswe tutikulōnda nayumo ukukileka ikipanga kyābo, uku...Kangi polelo linga umwe muli babine kangi mukulonda ukwīsa ukwīputilīgwa, kangi ikipanga kyīnu kikuyaga ni ngomano kilabo pamusi, yóba ku ntīmi gwīnu ukufwana ni kyēne, ukuti umwēne atikwipilīka mbubībi, umwe mumenye. Unko umwene amānye ukuti uswe tuli apa mbubombelo palikimo, uku—ukutula u Mbili gosa gwa Yeso Kristi ugu gukuyata kuno mu Dallas nukusyungutila.

¹² Popāpo, kilabo pamūsi, une ngwinogona, pa sala yabubilina-sinda, une nguyaga pakuyoba i Ndumi yalusasánio. Kangi polelo uswe tukwiputilaga abandu ababine bōsa, ukupimba amakadi ga lwiputo gosa ni findu ifi filekelesīgwe ukukinda mu ndungu, nukufipūtīla fyosa fya ifyēne kilabo.

¹³ Lilino ikimanyisyo kyangu ikilo iki kili bo itolo akokino akanini, itolo pa tubalilo tuníni. Kangi une ngugelaga ukubikámo ifingipo ikilo iki mumo une mbagile, pa kwiputila ababine. Untu gwangu go, “komma ukutila, ikyene yo Une,” Yeso ikuyoba. Ikimanyisyo kyangu kyo: *U Bukéti Pa Sūmbi*.

¹⁴ Ukwene kwābagile ukuti kwāli kwīlāno namayolo, ilisuba lyābagile ukuti līngilāga pāsi akabalilo kāko iki kyābonīke pa buyo, kangi lilino lyabagile ukuya lisiku ilipyano bo mūmo ikyene kiyīlīle nkati mūno.

¹⁵ Ilikina lyakatalalisya lifwīle, kangi abene bikutendekesyा ilyene. Iyo yo nongwa une nsanwisye ikimanyisyo kyangu ukufuma panja pala, iki une nāyāga pakuyobapo, ukuti une mbagile ukubopela ni kyene, ukuti umwe mulingitūgasyágā mbupyanbo múnō.

¹⁶ U ndobanswi unkulumba uyu, ukufuma pa kukibona iki umwene akindilemo mwi siku lilla, anketesyaga Yeso mbutumigwe Bwake abukulumba.

¹⁷ Une āngāli nīkyelīle ukuya nu būmi mu lisiku lila, ukunkonga Umwene. Loli, umwe mumenye, une nhobwi ke une ngāli ndinulusako ulwa kubomba ikindu kilakila, ukunkētésya Umwene ikubōmba ifindu. Kangi ikyēne kyo kikulumba ukukindapo ukunkētésya Umwene umwīsyūgu ukukinda mūmo ukwene kwāyīlīle lūla. Une ndinalo u lwītīko lwīngípo mwa Umwēne lilino, kangi mbagile ukuya nu lwītīko ukukinda mūmo une nābagile ukuyīla akabalilo kala, panongwa yakuti uswe twāli nafyo ifyinja maelifu mabili ukusimikisyā ukuti i Nongwainunu yo yakatalusya. Kangi ukufuma ifyinja maelifu mabili, Umwene akāli mumi, ikubomba itolo mūmo Umwene ābombīle akabalilo kala, popāpo uswe tuli nu busisimikisyō ubukulumbapo kangi ulwālo ulunywamupo ulwa lwītīko ukukinda mūmo abēne bāli nalo akabalilo kala.

¹⁸ Panongwa yakuti, Umwene ali itolo Nnyambala ikusyungutila nukwīyobela ukuti—ukuti Umwene ātumigwe ukufuma kwa Kyala kangi āli Mwanundumiana gwa Kyala, kangi ukuti Kyāla āsisimikisyaga i Lisyu Lyāke ilifingīgwe ilya lisiku lila, nu Mwēne, kangi abēne pabumo bāli ni nongwa yimo ukukilamwa ikyēne. Abafūndakyāla, abēne bāli! Kangi umwe kētésya ikyēne kyāli kindu kipelakisa, ikyēne kyāli naloliloli kipelakisa, panongwa yakuti abafūndakyāla bala āngāli bītíke Kila linga Kyāla akākupilile amaso gābo. Ili Bāngéli lyāyobíle lūlo.

¹⁹ Kangi ngimba umwe mumenye Umwēne āfingīle ukuti Umwene ikugogāga amaso gabu kangi umwisyugu, ukuti abene bikutoligwāga ukuketa ikyene? Abene bikuyaga “bantu, bamahala, bagana busangaluke ukukinda ukuya bagana Kyala, basitakusūbilígwa, abinogoneli babusyobi, bamatāta, bamahelu pa aba banunu; ukuya nu bubonekelo bwa bonyakyāla, lōli bikukānāga a Maka galimmūmo.” Itolo u lufīngo lugomokile kuno kāngi. Kangi ugwe ukabagíla kifuki lōli itolo ukubapelelela i kisa abandu, kangi amaso gābo gakupililígwe mpaka umwīsyúgu. Na Masimbo ukuti Kyala āfingīle ukuti sisakubonekaga lululu mu lisiku ili, mu sala iyi, kangi uswe tukukēta kulakula ku kyēne nukukētésya ikyēne. Kangi polelo abāndu bikukēta, nukusugania imitu gyābo nukusōkápo, nukuti, “Une ndikukibona ikyene.” Ikyēne kyo kindu kipelakisa, lōli pōpe a Masimbo gikufimbilisígwa ukufwanikisígwa. Ikyene kibagíla ukuya njila yila.

²⁰ Polelo aba bafundigwa bāsalígwe na Kyala. Ngimba umwe muketesise, Yeso ababūlile abene, “Bo ulwālo lwa kīsu lukālígwa,” Umwene ābasalile abēne, kangi abēne bāli luyungu ulusūngulígwe lwa Kyāla. Iyo yo nongwa akabalilo kāko ulutamio lukwīsapo, kangi abāndu bāfwanágaga ngati bālimbīkile Yeso mu nguto, pa lilālusyo, likālipo nililālusyo limolyene ku bēne. Abēne balinkutōlígwa ukukipilikisyaya ikyene, lōli abēne bāsisimikisyaya ukusitakumanya ikindu nakimo ikingi lōli Umwene. “Ugwe gwimwene uli ni Lisyu lya Būmi.” Kangi abēne bāsisimikisyaya ukusyāla ni Lyēne, panongwa yakuti abēne bāsūngulígwe ku bubombela-mbombo bula.

²¹ Kangi momūmo kiyilíle ikyēne umwīsyúgu, ukuti abanyāmbála na bakikúlu, aba basungulígwe ku Būmi bwa Syēpwa, bikwīságá ku Būmi bwa Syēpwa. “Bosa aba Tāta ambele Une bisawkwīságá kwa Une.” Ilyo lyo Lisyu Lyāke, kangi likabagíla ukutoligwa. Ilyene—ilyene lyo Lisyu lya Kyala.

²² Kangi uswe tukukēta abafūndígwa aba lilino, ukuti bāli nu lukomano ulukulumba ilisiku lila, panja pa ngunda unkulumba mula pa lubafu lwa kyāmba. Kangi Yeso ababūlile abēne, “Lilino umwe talāga ukukilania inyanja, nkyeni mwa Une.” Kangi Umwene ābukága mmwanya nkyāmba, pamwene, ku lwīpúto.

Kangi abafündígwa aba, ukufuma ukwāgána na bīnābo, une mbagile itolo ukwinogonela mūmo abēne bīpilikilágá.

²³ Panongwa yakuti, ukwāgána na bīnābo, kangi polelo ukufimbilisígwa ukulekana na bīnābo; itolo kifuki akabalilo kāko ugwe kwanda ukwisibilana, polelo ugwe kufimbilisígwa ukulagana. Kangi uko ko akabalilo kōsa ko kāli luko lwa kubabandumbula kwa une, ukukilania nkīsu, ukusyungutila nkīsu kyapāsi, kwāli ukwāgána na bīnāngu kangi polelo ukubaleka abēne, umenye ukuti balipo bīngi aba ugwe utisakubonaga kāngi mpaka ugwe kwaganaga na bēne ku Bulungi. Ikyéne kyo kya luko lwa kindu kisulumanisyé.

²⁴ Une mbagile ukwinogonela u bwāto, ni—ni kyéni kya ubwēne bugutígwé nkiloboko. Kangi abagile ukuya yo Simoni Peteri, ni ngongi syāke isyamaka ni fibega, uyu āgutile ubwāto ukusyungutila nukugatalusila nkati mwa sūmbi. Kangi abēne bosa bikuyigisya amaboko ukulagana ku bāla pa kiloboko. Kangi abēne balinkuywega, “Mwise kangi kuno kangi ntawala u Fundi kuno ukutukēta uswe! Kangi mwise ukuya nulusasanio ulungi; uswe tusayigwe fiyo umwisyugu!” Kangi abīnābo abapya bikuyigisya amaboko. Kangi umwene alinkufyuka pamwanya pa bafündígwa bōsa, nukwitugasya lumo pa lubafu lwa nnuguna gwāke, Andrea, nukupimba mmwanya ingafi.

²⁵ I—i sitima akabalilo kala syafigigwága pamo nu mbelo pamo ni ngafi isi abēne bākwabága. Kangi polelo lumo abēne bītūgasýága babíli mu bwāto, babíli pa lubafu lumo, kangi abēne bābagile... pamo babíle nkikota kimokyene, ndigi, lumo ntāndātu pamo ifikolekelo fyāngáfi lwele. Abēne bākwabága nkabalilo kamokene, kangi mu njila yila abēne bābagile ukutoteka imbulo yāke akabalilo aka u mbelo gwapūtágá. Polelo, imibelo ukupūta lulwabwila, abēne bābagile ukufusyusa mmwanya mwenda gwambelo, nukwenda nkyeni pa misi.

²⁶ Kwabagile ukuya pamusi apapyano, ukufuma ku bubonekelo bwa Lisimbo itolo bo lukomano ulu lukāli, kangi popāpo ukwene kwābagile ukuya naloli pamusi apākimyemye, pālisuba, papyano. Ilisuba lingilaga. Kangi abēne, bo abēne bikufiga ingafi, kangi polelo ukwabula ingoye syosa nukuyigisya amaboko pakulagana ba bāndu, “Tukusūbila ukwagana na umwe kangi akabalilo kamo,” bo abēne bikubuka panja mwa sūmbi. Kangi kwingila kwa lisuba, kangi amayolo kwilile, kangi polelo ukufuma pa kabalilo i—i ngīsi yilinkwīngila mula.

²⁷ Kangi abēne bābagile ukuti bāfikílepo ukuya nu bwēngo ubununu ubwa—ubwa kufiga, kangi iyo yo mbombo ngafu akabalilo kāko ingafi sila sikwiybika nkati mwa sūmbi. Kangi kifuki bōsa ba abēne bāli—bāli baloba’nswi, kangi banyāmbála abamaka abakulumba, bīsibile kwa sūmbi yula. Kangi popāpo bo abēne bāgulilágá Yeso ukwingila mu bwāto nukubakōnga abēne nkyeni, nakalinga lululu. Fiki, abēne balinkwisa panja

pala, kangi abēne bābagile ukwelēla itolo pakayabo akanini; mu luko lwa kwega i sitima yāko ukwandako, kangi polelo ukuyileka.

²⁸ Lumo u nkeke Yohani abagile ukuya gwakwanda ukuyobapo, panongwa yakuti umwene āli yo nkeke pa bosa pakibugutila. Kangi ikyene kyābagile ukuya umwene uyu āyobile, “Une ngufika itolo ukuya ngatele panini. Unko uswe twelelége pa kayabo akanini. Gūlila i miniti, uswe tutukufimbilisigwa ukubopela. Umwene akāli akisa muno tāsi, polelo uswe kifwene nukuti tugūlile pakabalilo kanini kangi mu luko lwa kyegapo ubutuyo ubununu bwa mbepo.”

²⁹ Kangi bo umwene ālitūgésye pala nuntu gwāke pāsi panini itolo, umwene abagile ukwanda u lukomano lwa bukēti. Kangi ikyo kyo iki une ngulonda ukuyobapo. Ikyene kyābagile ukuya umwene uyu āsumwike mmwanya tāsi, kangi alinkuti, “Bakundwe, kali abāndu bikuyoba fiki, kangi filinga ifi aligwesa ikulonda ukusita-kwitika, une naloliloli nsisimikisyé lilino, ukufuma mwisyúgu, ukuti uswe tutukongwa unsyobi. Uswe tukukongesya nakimo ikinandipo ukyakusyalapo pa Kyāla, kabuno nu mündu nayumo abagile ukubōmba iki Umwene ābōmbile umwisyúgu pene pāpo ikyēne āli Kyāla. Umwe mumenye, akabalilo kāko Umwene ālyēgile ifisyesye fila nukutumula ifyene, nukulyesya maelifu mahano pala, kila kyo kindu ikiswigisyé ukukinda kwa une. Pala kwabagile ukuyapo ililālúsyo mpaka lilino,” lilino une itolo ngwandisya u bukēti bwāke mūmo ubwēne bwayilile, “lōli ikyo kikumasya ikyene.”

³⁰ Alinkuti, “Une mbagile ukukumbukila ifyinja ifi fikindilepo. Une nālisibile ukwitūgásya pāsi kifuki ku Yorodani. Kangi une mbagile ukukumbukila, ukuya ndumiana unnini, mūmo ummogi, u māma gwāngu gwa kiYuda āmbimbágá une mmwanya, ku namayolo, nukunyikásya une pa malundi nukungūsa une, panja pa mbenu, akabalilo kāko ubulenge bwasōkaga mula mulubafu lwa filoboko fya Yorodani. Kangi umwene ālisibile ukukēta ukukilania ukwingilila ku lulangalanga, ukufuma kūko abāndu bītu basōsígwe ukukinda u lulangalanga ulu. Umwene ālisibile ukumbula une utupango twa mu li Bāngéle. Kamo mwa tupango utukulumba utu une ngukumbukila, kāli ka nkikúlu gwa Sunemu kangi akabalilo kāko undumiana gwāke unnini āfwile, kangi—kangi u nsololi alinsyūsísyé undumiana unnini uyu kangi ukufuma ku bafwe. Kala kāli kapango akasangalusye fiyo.

³¹ “Lōli kamo mwa tupango utusāngulúsye, kangi māma ālisibile ukumbula une, umwēne ātigi, ‘Lilino, Yohani, ugwe itolo gwe ndumiana nnini; lōli une ngulonda ugwe ukukumbukila, linga ugwe kukula kuya nkusi, ukuti, u nkulumba Yehova abātwele abāndu bītu ukufyūka ukufuma ku Igupto, kangi uswe twālisile ukwisila mu lulangalanga ukukilania ikisōko kila. Kangi bōsa ku fyinja malongo

mana, abēne bālyēndile mu lulangalanga lula, bukāliko nu buyo nabumo ubwakugyága imyenda, nabumo nu buyo bwa kulila. Kangi Kyāla āgwisyága pāsi ukufuma ku mwanya, ikilo kilikyosa, nukubalyésya abāndu bītu mu lulangalanga lúla, panongwa yakuti abene bali mu lukindi lwa mbombo, ukunkōngesya Yehova unkulumba. Kangi lilino, ilisiku limo, Yehova isakupeligwága mbili apa pa kísu, mbubonekelo bwa Nnyāmbála, Umwene isakukoleligwága umonelelígwe Yula, u Mesiya.'

³² "Kangi une ngukumbuka," umwene āyobága, "ukuya ndumiana unnini, mūmo fikuti ilinogono lyāngu lya ndumiana unnini lyālisibile ukwinogonela, ukugela ukwinogonela, 'Ngimba u Kyāla abalyésisyé bulebule bōsa bala, abāndu maelifu-elifu mabili na sinda, ndulangalanga? Ngimba agwagile kugu Umwene unkati gōsa gula?' Kangi une nālisibile ukundālusya māma, 'Māma, ngimba Umwene, ngimba—ngimba Yehova ali nafyo ifibugutila fya fyākupiyíla pamwanya pala mmwanya, kangi Umwene āpiyága unkati gōsa, nukubomba mpaka pakilo nukugubíka ugwene panja pamwanya pa—pa pāsi, panongwa ya bāndu, kangi imyanya iminywamu igya Kyāla gīswile ni fyakupiyila?' Umwene álisibile ukuyoba, 'Umma, mwanundumiana, ugwe uli nkeke fiyo ukabagíla ukupilikisyá. Uketíle, Yehova yo Mpeli. Umwene atikulondigwa mma ifyakupiyíla. Umwene itolo ikuyoba, kangi Ilisyu Lyake lisimikisigwe akabalilo kako Umwene ikuyoba. Umwene yo Jehova unkulumba, kangi Umwene alinkukiyoba ikyene itolo. Kangi a Bāndúmi balinkuyabania ugwene pāsi pa mfu, ku bāndu.

³³ "Kangi umwisyugu, akabalilo kako une ngetege Umwene ikwīma pala, ngimba umwe muketesisyé akabonekelo pa kisyo Kyake? Pala kukālípo nu kwilámwa mu linogono Lyāke. Une nāfyūkile pamwanya kunyuma kwa libwe, nukunkētésya Umwene bo Umwene egaga u nkati gula nukubūguyúla ugwene, nukugubíka ugwene kula ku... Ababombi Bāke, uswe, ukuyabanisania ugwene ku bāndu. Kangi polelo akabalilo kāko Umwēne āfikilága ukubūguyúla kāngi, unkati gula gwālipyāníkisyé kangi. Kangi Umwene ābombíle ikyo ka mia kingikingi, mpaka aligwesa ālīkwíte, kangi fyālipo ifilundu, fiswile, fibūnganisígwe. Une mmenye yula akabagíle ukuya nsitakusyalapo pa Yehova, panongwa yakuti Umwene ābombelága bo yu Yehova ābōmbíle. Mwene yu Yehova abagíle ukupela. Kangi une mmenye ukuti u Nnyāmbála yula akaya nsyōbi mma. Alipo u Mpeli yumoywene ntiga, kangi yula yo Yehova. Kangi lilino, pa fyōsa ifindu ifi une mfibwene, kila kyalinyíkutísyé une.

³⁴ "Une ngulonda umwe ukumanya lilino ukuti i ndumbula yāngu yo yilāmbíkigwe yōsa, kangu une ngwitika mōsa ukuti Umwene yo akaya nsololi itolo mma. Umwene yo nsololi,

lōli Umwene yo ukukinda nsololi. Umwene akaya nakimo ikyakusyalapo pa Yehova Kyala ikwitugásya pakati pa uswe, panongwa Umwene āpelíle unkati, kangi Umwene āli na kabombelo ka Kyāla. Yo nongwa Umwene ābagíle ukuyoba, ‘Linga une ndikubomba imbombo sya Tāta Gwāngu, polelo mungitikaga Une umwe umma; loli linga une ngubomba imbombo sya Tāta Gwāngu, kangi umwe mukabagila ukunyitika Une, itika imbombo, namanga isyéne sikubíkila ubukëti isya Une kangi sikulíngánia Uyu Une n’di.’ Kwabonekaga ngati abāndu bābagíle ukukibona ikyo, nubupepe.”

³⁵ Kangi Yohani ālikutisígwe ukuti Umwene āli yo Mesiya, Yūla uyu Yesaya āyobíle, “Kwa uswe Mwana apapigwe, kangi i Ngamu Yake isakukoleligwaga Mfundí, Nsōka gwa Lutengano, Kyala Gwamaka, Tata Gwabwilanabwila.” Kangi Yohani ālikutisígwe panongwa ya iki umwene ākëtíle. U mwinitu unkeke ikupa ubukëti bwāke.

³⁶ Ukufwana akabalilo kala, Simoni Peteri āyobíle, “Ena, lilino, itolo i miniti. Linga uswe tukuyaga nu lukomano lwa bukëti, une ngulonda ukuya nako akandukamo ukuyobapo. Umwe mumenye, une nälöndesýága ubusóbi pa kindu kyōsa kila, akabalilo kāko u Andrea unnuguna gwāngu, uyu ābukilémo ku lusasanio lwa Yohani u nsololi, uyu ābikíle ubukëti ukuti u Mesiya ikwisa kangi umwene isakunsósola Umwene. Kangi une nāli panini gwakulonda-ubusóbi ubwa iki Andrea ayaga pakumbula une, panongwa yakuti une mbilike u luko lōsa ulwa tupango twa Mesiya na filifyósa ifingi.

³⁷ “Lōli umwe mwesa bakundwe mukukumbukila u tāta gwāngu unkangale. Ingamu yāke āli Yonasi. Kangi umwe mukunkumbukila umwene, isya mūmo fikuti umwene āli fiyo mwitiki gwanaloliloli. Mūmo une ngukumbukila māma na tāta, na twesa ba uswe, panongwa yakuti uswe twālobag’iswi kuli bwitügásye bwītu, kangi uswe tukākolágá niswi nasimo; uswe twāfumbwágá u nkati, kangi mūmo fikuti uswe twafugamaga pa kipālo nukwípúta kwa Kyāla, ‘Tupāpo uswe ukukóla iswi umwísyúgu, Kyāla, ukuti uswe tubagíle ukulísyá iswi syítu, nukuhomba ifyakumelelígwá fyítu, ukuya ni kyākulya ukulya.’ Kangi mūmo uswe twābükilágá panja mwa sūmbi, mu mbélo, nukuya bakifu uku—ukwagana ni mibelo gila.

³⁸ “Kangi tāta, une mbagíle ukukëta imbuha syāke sikubebeluka pāsi ku nyuma yāke, ilisiku limo bo umwene itugesye pa lubafu lwa bwāto nukuyoba kwa uswe, ikuti, ‘Simoni, ugwe gwe mwanundumiana unkulumba. Ugwe umenye, une akabalilo kōsa nítíke, Simoni, ukuti une nābagíle ukunkéta Mesiya. Abāndu bītu bandondesísyé Umwene ukufuma mu Edeni. Kangi uswe túsismikísyé ukuti Umwene ikwisa, kali ikyene kikuya kitali bulebule. Ikyo kyāli ifyinja amaelifu mana ifi fikindilepo, ugwe kuyoba. Loli une ngwitika ukuti Mesiya ikwiságá. Kangi unJuda aligwesa ítíke ukuti

umwēne ikumbonága u Mesiya mu ngulilo yāke. Une ngusūbíla ukumbona Umwene mu ngulilo yāngu. Lōli ikyēne kikuboneka ngati, une ngufikapo ukuya nkāngále lilino, une ngufimbilisígwa ukwīmika u sūmbi, kangi nguya ni fyākwipilika nu bubábe, une lumo ndikwīsa kumbonamo Umwene nkabalilo kāngu. Lōli lumo ugwe kwisakumbona, mwanangu.

³⁹ “Polelo une ngulonda akukumanyisya ugwe m’Māsímbo. Mwanangu, bo u Mesiya akāli ukuboneka pa buyo, pisakuyapo u luko lōsa ulwa findu fikubōmbígwa, u lúko lōsa lwa findu ifisyobi, panongwa yakuti Sétáno isakubombágá ikyo, ukōnángá ubusōngi bwa Mesiya ugwanaloliloli akabalilo kāko Umwene ikwīsa.” Ikyene kyo akabalilo kōsa kyāli mu njila yila; nalino kili lülo.

⁴⁰ Kangi polelo uswe tukwaga, umwene alinkuti, “Une ngukumbuka umwene ikubíka ulukōngi lwāke ukusyungutila une, alinkuti, ‘Mwanangu, yilipo injila yimoyene iyi ugwe kwisakundingania u Mesiya yula. Lilino uswe twafuma pakuya na bamia ba fyīnja kisita nsolóli. Malaki āli nsolóli gwābumalikísyo. Ikyo kifumile ukuya ifyinja ba mia bana ifi fikindilepo, uswe tukāli nágwe nayumo u nsolóli. Loli kumbukilaga, Möse ātubūlile uswe, mu Māsímbo, ukuti, akabalilo kako Mesiya ikwisa, Umwene abagile ukuyaga nsololi, akabalilo kāko Umwene āfyūkile pa buyo. Uswe twe ba Yuda tumanyisígwe ukwitika u nsolóli. Kangi injila ya Mesiya pa kīsu yo Lisyu iliyobígwe lya Kyāla, ili Umwene afingíle kwa uswe. Kangi i Lisyu akabalilo kōsa likwīsa kwa nsololi, kangi u nsolóli ikusisimikísya i Lisyu lila. Komma ugwe siku ukwibwāmo ikyo, mwanangu! Lumo pabagíle ukuyabpo ifindu ifikulumba ukufyūka, lumo pabagíle ukuyapo ifyākunyenymusya fikulumba kangi—kangi ifindu ifikulumba. Loli kumbukilaga, u Mesiya isakuyaga nsolóli, panongwa yakuti uswe tumenye ukuti Kyala atikwandulamo siku injila Yāke, kangi Umwene āyobíle ukuti Mesiya isakuyaga nsolóli. Popāpo kumbukilága, mwanangu, abasolóli bo bala aba bikuya ni Lisyu lya Ntwa. Kangi akabalilo kako Mesiya ikwisa, Umwene isakuyaga nsolóli.

⁴¹ “Une ngāli mbagíle ukwipilika ulukōngi lwāke,” alinkuyoba Simoni, “bo umwene ikubíka ulwene ukusyungutila une. Kangi Andrea ālímile pala ikusuka ulwēlo, pa kabalilo kāla. Ugwe kukumbukila ikyēne, Andrea?”

“Ena, Simoni, une—une ngukumbukila ikyene.”

⁴² “Kangi Andrea ikugela ukumbula une ukuti u Yohani uyu āli nsolóli. Une nāli ni findu ifingi ifyakubōmba, nāfimbilisigwágá ukūlisya iswi ni findu. Popāpo tāta afwile ku fyinjo, lōli une akabalilo kōsa nkikyūngíle kila pa linogonelo lyāngu; bāba alinkuti, ‘U Mesiya uyu isakuyaga nsolóli undinganisígwe naMasimbo, kangi komma ukwibwa ikyēne, panongwa yakuti

ilyene lyo Lisyu iliyobígwe lyo Kyala. Kangi i Lisyu lila lyo kingingi akabalilo kôsa lisile ku basolóli; aba bâkilíngénie ikyène, pamo bânângísyé iki kyâfingilígwé ku ngulilo yila.””

⁴³ Kangi lilino Simoni, “Ilisiku limo,” alinkuti, umwene alinkuti, “ugwe umenye, Andrea alinsûmîle une ukubûka ku lukomano lumo. Kangi une nâsulwîke pâsi kula ku lukomano kûko u Mwinitu uyu, Yeso, âli. Kangi une nâpilíke u luko lôsa lwa ndetési. Âlipo yumo u Yeso âtupwîke, bo Umwene akâli, uyu âfingíle ukuya ikindukimo ikikulumba kimo, alinkubalöngoléla abându bamia bana kangi abène bôsa balinkupyütígwâ, na fyôsa bo ifyo. Une ninogonága ikyène kyâli itolo ikingi kimo kya ifyène ifya luko lula, nu luko lumo lwa lunyenyesusyo ulukulumba ulwa luyigo lumo, pamo ikipanga-kipâgúke ikikulumba kimo abène bayaga pakutendeka. Loli ilisiku limo une ndikwinogona ukuti une mbuke panja na Andrea apa, unnuguna gwangu.””

⁴⁴ Kangi une mbagíle ukwinogonela, kifuki akabalilo kâla, ubwâto bulinkwânda ukuyuganisígwâ. Yumo alinkwanda ukulata, kangi umwene alinkuti, “Itugasya pâsi! Komma ukuyûgânia ubwâto. Gûlila i miniti. Itûgásya kimyemye.””

⁴⁵ Kangi umwene alinkuti, “Umwé mumenye, akabalilo kako une nâbukile kula nukusegeléla nkisyô kya Mwene, akabalilo kâkwânda, Umwene alinkukëta itolo kwa une nkisige nukumbûla une iyi ingamu yângu yâli. Umwêne akâlimbwenémo une siku pabutasi. Umwêne akâlimménye itolo mma, lôli Umwêne âlíménye utâta gwângu unnyakyâla unkângâlé yula, uyu âlimmanyísyé une m’Mâsîmbo. Kangi une nâménye ukuti Yula âli Mesiya. Kila kyamasísyé ikyène kuli une, palapala pala. Kila kyâli. Kila kyâtendíke ikyène ukuya kanunu, kwa une.””

⁴⁶ Åbagíle ukuya Filipu alinkuti, “Ngimba une mbagile ukuyobapo ilisyu apa?”” Lilino umwene alinkuti, “Nkundwe Natanieli, unko iki kingakufulasyaga ugwe; panongwa yakuti, uswe twâfundíle ifinienga ku fyinja ni fyinja, iki Mesiya ikuyaga. Lôli akabali kâko une nâlimbwéne Umwene ikubômba kila, une ndikunyamuka nukumwega umwinangu apa, Nataniele. Kangi akabalilo kâko umwene ikwisa pala . . .””

Nataniele alinkuti, “Unko une mbabule ikyene. Unko une mbabule ikyene.””

⁴⁷ O, umwe mumenye, kilipo ikindukimo ikya kabalilo kâko Yeso abômbíle ikindukimo kuli ugwe, ugwe—ugwe itolo ukubagila kifuki ukwîma kimyemye, ugwe kufimbilisígwâ ukuyóba ikyène, gwîmwéne. Ngimba isyo ndalusye? Linga ikyene kyabwanaloli, ugwe kufimbilisigwa itolo ukuyoba ikyene. Akabalilo kako Umwene âlînyusísyé na Mbepo Mwikemo, une ngulonda ukuyoba isya ikyene. Une ngulonda umunduyumo ukumanya isya ikyene. Komma umunduyumo uyungi ayobege ikyene; une ngulonda ukuyoba ikyene, nimwene.

⁴⁸ Kangi une itolo ngwinogonela, Natanieli alinkuya na maka gōsa kangi alinkuti, “Umwe mumenye, une ngulōnda ukuyoba iki. Une nāli panini mwilāmwe gwa ugwe, Filipu, akabalilo kāko ugwe gwālimbūlile une. Une nakulālusisye ugwe, ‘Ngimba kubagile ukusōkāko kamo akanunu ukufuma ku Nazareti?’ Kangi ugwe gwālimbēle i lyāmulo ilinunu ilikinde ili u mündu alimo nalyo siku, ‘Gweisa kangi usakēte.’” Kila kikubōmba kubununu umwīsyūgu. Uko ko kutalusya. Komma ukusyāla ku kāya nukulōndésya-busóbi. Gweisa, kyagania pa gwimwene, muketile. “Alinkuti, ‘Ngimba kubagile ukusōkāmo akanunu ukufuma ku Nazareti?’ Alinkuti, ‘Gweisa nukwīkētēla gwimwene.’ Kangi ugwe umenye iki ugwe gwālimbūlile une.

⁴⁹ “Kangi akabalilo kako une nāsegelilé mu Kuyapo Kwake, kangi Umwene ālīmbulile une ukuti une nāli ‘u—u n’Hiburi, u mw’Israeli, kangi nāli nnyambala ugwanaloli-ndumbula,’ une nāmenye ikyo.

⁵⁰ “Lōli une nāswigága, ‘Ngimba ikyene kikuyága bulebule?’ Umwene ābonekága ngati nnyāmbála aligwesa. Une nāgūlilága u Mesiya ukwīsa ukusuluka amasulukilo gagolidi ukufuma ku Mwanya, kulakula ku ntu gwa kipanga-kipāgúke iki, ku Yerusalem, ukwenda panja nukuyóba, ‘Kaifa, Une mfikile.’ Lōli abēne bikusyāgánia, Umwene ikufumila ku Nazareti, ukufuma ku kikolo ikipīna; kangi naloliloli u luko lwa ngamu inditu kunyuma kwa Mwēne, ukuya ‘mwāna unsigwána.’ Apa Umwēne ālīmíle, afwēle imyēnda igyaitolo, komma ngati mpūti pamo umunduyumo; itolo u nnyambala gwaitolo. Kangi une ndinkwinogona, akabalilo kako une ngwenda ukufyuka kula, ‘Ngimba kibagile ukuya bulebule Mesiya kila? Afwēle umwenda gumogwēne unkūlu, Umwene āfwēle ukufuma pāpo Umwene āli mwinitu nkeke, kangi apa afwēle umwenda gulagula; kangi inywili Syake sisulwīke pāsi ku nyuma Yake. Kangi bo nnyambala gwaitolo gwa lukindi.

⁵¹ “Kangi Umwene alinkuneta une nkisyo, kangi alinkuti, ‘Bo Filipu akāli nukukukolela ugwe akabalilo kako ugwe gwāli pasi pa mpiki, Une nākubwéne ugwe.’ Kila kyamasisye ikyēne kwa une. Une nāménye, ukwisila mu Lisyu, yula āli Mesiya. Yula āli yo Umwene.”

⁵² Kangi u bwāto bwābagile ukwīyugánia, kangi u lukomano lwa bukéti bwākindililága. O, ko kabalilo kanunu kaki abēne bayaga nako, panja pa sūmbi pala, itolo ukuya na kabalilo akakulumba.

⁵³ Andrea alinkuti, “Une ngulōnda njobe ikindukimo iki mu luko kyālinyālangénie une pa kabalilo kanini. Ugwe kukumbukila akabalilo kāko uswe—uswe twasulukaga ukubuka ku Yeriko? Umwene alinkuti, ‘Uswe tukufimbilisigwa ukufyuka; Une mfumbilwe ukubuka ukwīsila Samaria.’ Popāpo, Umwene alinkfyuka ukubuka ku Samaria kangi kula ku kāya ka Sychar,

akabalilo kāko Umwēne ātutumíle twesa ukwakūla ifyākulya kula nkāya.”

⁵⁴ “O, ena, une kumbukilaga, kanunu!” Bosa ba abene, “Ena, ena!” Ubwāto itolo bulinkwīyugánia, aligwesa ali nu bukéte ubuswigisye ukufuma pāpo ulusasanio lwāmalíke. Popāpo abēne bāyāga nu lukomano lwa bukéti ulu.

⁵⁵ Kangi umwene alinkuti, “Ena, kangi ugwe kukumbukila uswe tulinkwingilila pala, kangi, ku buswigo bwītu, uswe twālimbwéne u Fundi gwītu ikuyobesania nu ndogwe. ‘Uuhuu,’ uswe twālinogwíne, ‘ikyo kyo kibibi. Nkēta Umwene panja pala ikuyoba ku nkīkúlu unkeke uyu. Kangi ātutumíle uswe ukusōkápo, kangi apa Umwēne ali panja apa nu nkīkúlu u mfumuke-bubíbi uyu itugésye apa.’ Kumbukilága, uswe twālimíle itolo kunyuma ndusingi, kangi uswe tulinkupilikisyá ku buyobesanio bwābo.

⁵⁶ “Kangi uswe twālimpilíke Umwene ikuyoba ku mwene, ‘Nkīkúlu, būka kammwége undumego nukwisa kuno.’

⁵⁷ “Kangi uswe tulinkuti, ‘Ena, uswe twābagíle ukuya basóbi, lumo u nkīkúlu itolo mbwanaloli āli mwēgi.’

⁵⁸ “Kangi umwene ālinkētíle Umwene ku kisyo kyāke, kangi alinkuti, ‘Nkulumba, une ngānáyo u ndume.’

⁵⁹ “Umwe mukukumbukila mūmo indumbula syitu syamalíke? ‘U Mesiya unkulumba uyu uswe twālímó nu lusūbilo, apa ākōlígwe mbusyóbi, maso-na-maso, ’nongwa yakuti Umwe āyobíle, “būka kamwége undumego,” kangi umwene ābíkíle ubukéti ukugomola ukuti umwene akāli nayo undume mma. Lilino ikyēne kigomokíle nu moto ku Mwēne.’ Kumbukilaga mūmo twēsa twāboníke baswigisígwé, kangi umuyi gwasōkilémo mwa uswe?”

“Ena, une ngukumbuka ikyene.”

⁶⁰ “Kangi polelo umwe mukukumbukila amasyu amakōnge? Umwene alinkuti, ‘Ugwe uyobíle u bwanaloli, panongwa yakuti ugwe gwāli nabo bahano, kangi uyu ugwe kwītugasaya nagwe lilino akaya gwāko.’ O, umwe mukukumbukila u lukomano lwa bukéti kunyuma kwa lusingi? Mwe!” Muketile, ugwe ukagabile ukumbika Umwene pa nguto. Umwene yo Kyāla. “O,” Simoni alinkuyoba, “ikyo itolo...” Andrea alinkuyoba, “Kila kyāmasísye ikyēne kwa une.”

⁶¹ Bartulumeo alinkuyoba, “Gūlīla, une ngulōnda ukubíkápo ubukéti. Ngimba une mbagíle ukubomba ikyēne, bakundwe?”

⁶² “O, ena, une ngusakikisyá ugwe ubagíle, uswe tuli na kabalilo kākingi. Umwēne akāli akisa mpaka na lino, popāpo uswe tukufigaga panini itolo. Kindililága Bartulumeo, ugwe bīk’ubukéti.”

⁶³ “Ena, kimo mwa findu ifikulumba ukukinda kwa une, umwe mukukumbukila ulilumbu gwītu pāsi mu Yeriko, ingamu yāke Rebeka?”

“Ena.”

“Kangi undume endesyága ubuyo bwakulíla pāsi pala.”

“Uu-huu.”

⁶⁴ “Kangi—kangi umwene āli gwa biashara, kangi ingamu yāke āli Sakai.”

“Ena, ena, une ngunkumbuka umwene kanunu.”

⁶⁵ “Umwe mukukumbuka, umwene āli—umwene āli yumo gwa ilumbu bītu. Umwēne ālitíke pa Ntwa, kangi umwēne āli nu lutende ukuti Sakai ukukilekaga ikyene kinkinde kisita kwitikisyá Yeso. Kangi, o, Sakai āli nnine nnunu fiyo gwa mpūti kula. Kangi popāpo umwēne īputágá ukuti ikindukimo kikubonekaga ukuti amaso gāke gikwīgukágá, kangi umwēne isakusyaganiaga ukuti uyu āli yo Fundi, iki kyāli kyo Lisyu lya Kyāla ilisisimikisigwe, lipēligwe mbili pakati pītu. Kangi uswe twāgelíle ukumbula umwene... ukumbula umwene ukufwana na mūmo fikuti Yeso gwa Nazareti āménye isyakubutītu sya ndumbula, ukunāngisyá ukuti Umwene āli Kyāla, ‘nongwa yakuti i Lisyu likumanya inyinogono sya mu ndumbula.

⁶⁶ “‘Butoyofu,’ umwene alinkuyoba, ‘Une ngwitika u mpūti. Iki u mpūti ikuyoba kyo kinunu kifwene kwa une.’ Panongwa yakuti umwēne álingíle ku fyōsa i—imbātíko sya nkāya kala, aba Kiwanis na filifyosa ifingi, umwe mumenye, popāpo umwene... luko lwa kikafu kuli umwene ukukileka ikyene pāsi. Popāpo Rebeka átusúmíle twesa uswe ukwīpúta—ukwīpúta. Kangi akabalilo kōsa uswe twafikaga pa kimanyisyó ukuti Umwēne āli nsōlóli, umwene áyobága, ‘Butoyofu! U mpūti ikuti, ‘Umwene yo Belezebabu. Umwene ali yo mōhési. Umwene ikubomba ikyo na maka ga mōhési. Kangi Umwēne yo itolo mfunda-minogono-mbulosi. Isyo syene silipo ku kyene. Kikayapo nakimo ku kyene.’ Popāpo kikayako nakimo ikindu bo iki mulisiku ili; uswe tukāli nabo abasōlóli ku fyinja ba mia bingi. Kangi ngimba abagíle bulebule u Miana yula, nukuya ni likadi lya bulilanisi mma, ábagíle bulebule Umwēne ukuyamo siku nsōlóli? O, ni njila nayimo ukuti Umwene āli kindu bo ikyo!

⁶⁷ “Loli, umwe mumenye, Rebekah alinkūmilísya ukukōleléla, unkasi gwake, kangi ikwīpúta. Kangi ulubunju lumo akabalilo kako Yeso ikwisa nkāya, ena, polelo uswe tukusyāgánia ukuti, Rebeka átubūlíle uswe ukuti Sakai ábükíle panja ku—ku lukindi, ukunkéta Umwēne. Popāpo umwēne akítikágá mma ukuti Umwēne āli nsōlóli, popāpo umwene alinkuti, ‘Une itolo ngunkétesyága kanunu Umwēne,’ mūmo umwene áyobíle kwa uswe kubulílo ilisiku ilingi akabalilo kāko uswe twālyága. Popāpo umwene alinkufyuka mu mpiki gwa nkuyu, kangi alinkuti, ‘Ugwe umenye fiki, une ngwifisaga itolo nimwene

pamwanya apa ukuti Umwene ikutoligwaga ukumbona une. Une ne mündu unnini, mulimosa, mpimba fiyo. Kangi une ngabagíla ukumbona Umwene pāsi pala, nkilundilo, popāpo une itolo ngufyukaga mmwanya apa mu mpiki.' Kangi umwene alinkufika kūko isamba ibili—ibili syāganága, kangi pala umwene alinkwitugasya, pa samba isi."

⁶⁸ Apo po itolo buyo bununu ukwītūgásya pāsi nukufunda ikyene mōsa. Apo po pāpo injila sibili sikwágána, iyako na ya Kyāla; ifundu syāko. Ikyo kyo kindu kinunu, ukwinogona ikyene mōsa.

⁶⁹ "Polelo umwene alinkuti, 'Umwe mumenye iki, Umwene abagile ukuya nsololi. Umwēne abagile ukuya. Ikyēne kyabagile ukuya ukuti une nāli nsóbi. Popāpo une ngukubula fiki, une ngukētesyága Umwēne; kangi Umwēne atisakummanya une. Popāpo une ngwegaga itolo amāni gōsa nukugakwābila agéne nkati bo uli, ukusyungutila une, kangi une ngwikingaga nimwene ukuti Umwene atisa nukumbóna une na panandi. Kangi une ngunkētesyága Umwene akabalilo kāko Umwene ikukisánia. Kangi linga Umwene atikubōnéka bo uluko ulutálusye ulwa mundu, une ngumpágá Umwene akayabo ka linogono lyāngu, bo níkéle nkati muno nkipiki.' Popāpo umwene alinkukētesya, kangi āli ni lyāni ukuti umwene ābagile ukukupula mmwanya nukunkéta Umwēne akabalilo kāko Umwene ikwisa ukusyungutila i nguto.

⁷⁰ "Kangi akabalilo kāko Umwēne ikusyungutila pa nguto, ikwénda ukusuluka ulukindi, umwe mumenye, ukukéta ukufuma ku lubafu lomo ukubūku ku lüngi, kangi abafündígwa bikuyoba, 'Ima kulubafu. Nswaga une.' Kangi abāndu na bāna ababine ni findu. 'Nswaga une, Fundi akatele fiyo; ulukomano ulukulumba lula ikilo ikyammayolo.' Kangi, nubunyāmbála, 'Ngimba umwe twālamba ima palubafu nukummwitikisyá Umwene akínde, akabalilo kāko Umwene ikutendeka injila Yāke pāsi pa kāya, kangi ngimba muli imaga itolo palubafu twālamba?' Kangi Sakai itūgésye mmwanya apa mu mpiki, ikikukéta pāsi ku Mwēne.

⁷¹ "Kangi Yeso ikwisa itolo ukatalula pāsi pa mpiki, ikwíma, ikukéta mmwanya kangi alinkuti, 'Sakai, suluka pāsi ukufuma umo. Une ngubūka ku kāya na ugwe umwisyúgu, tukalyémo.' Kila kyāmasísyé ikyene kwa une. Umwene āménye umwēne āli mmwanya mula, kangi āménye i ngamu yāke, iki umwēne āli. Kila kyāmasísyé ikyéne. Uyo yo Mesiya, kwa une. Ena, nkulumba. Panongwa yakuti, uswe tumenyé Mesiya yula áyágá pakubōmbo ikyo. Naloliloli. Polelo Umwene āfimbilisigwágá ukubūka ku kāya nu mwēne, áyobíle, ilisiku lila panongwa ya kufyākula. Ko kabalilo akakulumba kaki akéne kāli! Uswe tukukumbukila akéne."

⁷² Umwe mumenye, akéne kābagile ukuya kifuki akabalilo

kāla, ulukomano lwa bukéti lwakindililága. Umwe mumenye, abafundígwá aba panja pala pa sūmbi, bikubíka ubukéti, ukwéne kwabagíle ukuya mbutítu bwa kilo pabuyobumo, kumwanywa ku fisu fya kululu kula, ukuti Sétáno ābagíle ukuti ályéndíleko kula kumwanya kwa kāmba kangi ākétíle pásí. Umwene ākétíle mu lukomano lwa bukéti bula, kangi umwene ásyágénie ukuti abéne bābükíle panja kisita Umwéne. Pala lwālípo u lusako lwāke.

⁷³ Muketile, une ngwinogona ukuti ububonekelo bula bo itolo bugomokíle kangi kifuki, bwīyāndísyé kāngi bwēne. Abéne bāli, mbunyenyemusyo bwa luyigo, abéne bāsōkilépo kisita Umwéne. Kangi une ngwitika ukuti ikyo kyo kingi kyo iki kibonié kwa uswe umwisyúgu, ukuti, mu sala iyi ya kwalangania, kangi ukufuma pa luyigo ulukulumba ulu lülo uswe tukétíle. Ulwéne lupyágíle ukusyungutíla i kísu kyapási. Ikkoko kilikyōsa kyāli ni myoto gya luyigo gibūmbígwé, kangi gikwáká; ingomano sya bubumbulusyo ingulumba; abāndu ukwambilila Mbepo Mwikemo, na makalongo ga maelifu ukwandisya na maelifu. Kangi mbunyenyemusyo bwa ulwéne, ngati bala abafundígwá ukubíkila ubukéti iki Umwene abóbíle, “kangi, o, uswe tumbwéne Umwene ikubombá *iki*, kangi uswe tumbwéne Umwene ikubomba *kila*,” une ngwitika uswe tusókíle panja bo abéne, kisita Umwéne.

⁷⁴ Uswe tubükíle panja pa sako inywamu ingulumba isi—isi uluyigo lupéle. Uswe tubükíle panja pa sako isya kutendeka i hela nyngi, ifipanga, ukuyénga imiyumba imikulumbapo, imikulumba iminywamu imibuyo gwamamiliyoní-ga-madola, amasukulu amakulumba, imbátiko syabumanyi, kangi ukutendeka ikipanga-kipágúke kyítu kikule. Kangi polelo ukuya ni mbátiko sya kikomyunisti kyítu, ukulwana ni kikomyunisti, ikyo kyo kyōsa iki uswe tukuyobapo umwisyúgu. Kangi ikindu kyākwánda umwe mumenye, Sétano atubwéne uswe pa mbátiko syítu isya kulwana-ni-kikomyunisti, pa mbátiko syítu inywamu isya ifipanga-fipágúke, kangi pa gwítu “miliyoní ukongelelápó,” na fyōsa bo ifyo, mûmo abéne bafikilépo.

⁷⁵ Kangi uswe tusókíle panja kisita ingomano sya nyipúto isyakabalilo-kaiyolo nu lōsyo lwa Mbepo Mwikemo ukugomokela, mpaka u moto gwákíle pásí. Ugwe ukabagíla ukukúta panja, nukugela ukubatwála abāndu ku kigémo, kangi abéne bikwénda itolo mmwanya ngati abéne bāli kifuki bafwe, ikitiligwe ukwisa. Kangi ukusuma ababombi ukwisa ukwípúta na bêne, “O, ngimba umwene ánsúmágá une panongwa ya fiki?” Kangi abéne bikufika pásí pala, kangi ugwe ukabagíla nubukafu ukubága abéne. Kangi abéne bisakwíma pala itolo pa maminiti manini, ukukukéta kwa ugwe, nukogomokela nukwâkwitígásya mfikota fyābo. Kwa une, umoto gukindilemo! Ikindukimo kyabonike. Pilikisyá! Iki uswe tufúmbílwé lo luyigo, ulu

abatulwanongwa, ukukēta pa Kristi, bikupīndūka, bikubōpéla ku kigemo na maboko gābo mmwanya, ukukútilla i kisa, kangi ikipanga kyo lulápi lwa moto, nu lwímíko lwa Kyāla.

⁷⁶ Ulunyenye musyo lwítu panongwa ya lusako ukutendeka ifipanga-fipágúke fyítu fikúle, uswe tuyēngíle amasukulu amanywamupo ukumanyisya abalumbilili, nukubatuma abēne kubatalipo ukufuma kwa Kyāla ukukinda mūmo abēne bāli ku bwandilo. Kyala atikumanyigwa munjila ya bumanyili mma. Umwene atikumanyigwa nu bufunda-kyāla mma. Kyala yo amanyigwe nu lwitiko. Ugwe ukabagila ukulingania Kyala. Umwene yo nkinda kulinganisígwa.

⁷⁷ Kēta iki ikyēne kibōmbíle, uswe bāndu ba kiPentekosti twe twāli ba kipentekosti. Abakikulu bitu batumwíle inywili syābo, ukupakaka ifyakwiyandula. Abanyāmbálá bitu bikwītikísya ikyēne. Abalumbilili bītu bikwītikísya ikyēne. Abēne bikutíla ukuyóba ikindukimo isya ikyēne. Ikipanga kisakukagaga abēne panja linga abēne bikubōmba. O, linga uswe tutikulōndígwa ukupyágila kwa nnyumba, ukufuma ku kigemo mpaka ku kipālo. Ikyēne kyo kikosya-soni. Ikyēne kyo kyākuywélula.

⁷⁸ U nnyāmbálá yumo ikwisa kwa une, pakaya patali mma, nukuti, “Nkundwe Branham, abāndu bakuganíle ugwe.” Lōli alinkuti, “Ugwe akabalilo kōsa kubakemela abēne pōsa, ukukémela abakikúlu bala, isya kuya ni nywili imbibimba ni findu bo ifyo.”

Une ndinkuti, “Ili Bāngéli lyāyobíle ikyēne kyāli kyākuywélula kuli umwene ukuya ni syēne.”

⁷⁹ Umwene ikuywélula undume gwāke akabalilo kāko umwēne ikubōmba ikyēne. Kangi ikyēne kyo naloliloli kimanyilo ukuti ugwe usōkiléko kwa Kyāla. Kumbukilága, mu nongwa ya Samsoni, inywili indáli kyāli kimanyilo kya kiNaziri ukuti umwēne āsōkiléko ku kīsu, ukubūka ku Lisyu lya Kyāla. Kangi akabalilo kāko ugwe kutumulako inywili syīnu, bakikúlu, umwe mukupíka ikimanyilo kyīnu kya kiNaziri. Umwe mubükíle ku Hollywood mbuyo bwa kugomokéla ku i Bāngéli. Ili Bāngéli lyāyobíle, “Unko abēne bayega basita-kusēngigwa.” Muketile, ikyēne kyo soni, kangi ababōmbi batikuyobápo nakimo isya ikyēne.

⁸⁰ Unnyāmbálá uyu āyobíle kwa une, “Nongwa ya fiki ugwe utikubaleka abakikúlu bala pabēne?” Alinkuti, “Abēne bikukwēga ugwe ukuya nsololi.”

Une ndinkuti, “Une ngāyobilémo siku ukuti une ndi nsololi.”

⁸¹ Alinkuti, “Abēne bikukwēga ugwe ngati ikyo. Bamanyisya abēne akāmbilílo ka fikungilwa fyamwambepo nukubōmba ikindukimo. Ugwe ubagile ukubamanyisya abēne ifindu ifinywāmu, ifindu ifikulumba.”

⁸² Une ndinkuti, “Une ngubamanyisyaga bulebule abene i aljebra akabalilo kāko abēne batisa nukumanyila aba ABC bābo, akīkalílo mbwifýusi isya ikyēne? Ngima ugwe kubōmbelága bulebule ikyēne? Ena, būka pāsi ku kīndu ikyākwanda.”

⁸³ Ikyinja ukufuma ku kyīnja, ukukilania ikīsu, kangi ikyēne kikufika ukuya kinalipo akabalilo kōsa. Kilipo ikindukimo kitamisye pa buyoyomo, ikyēne kikaya ni Lisyu. Kisita kuswiga uswe tukutolígwa ukuya ni myoto gya luyigo gikwāka. Uswe tukufūmbwa akabalilo kakupyāgila inyumba. Kyāla atisakubōmbámō siku ikyo mpaka uswe tugomokele kāngi. Uswe tukufūmbwa akabalilo kākupyāgila inyumba.

⁸⁴ Kangi ugwe nnyāmbála, ugwe kundeka unkasigo ukubōmba i kīndu bo ikyo, ukufwala akabundu! Abēne bakaya baMethodisti, baBaptisti. Abo bo baPentekosti, uko ko kutalusya, “ububoneke bwa bunyakyāla, Ngulilo ya Kipanga kya Laodikiya, ikulūngúle,” Pentekosti pa ngamu, po pene itolo. Pentekosti yikaya ngamu mma, ubwene bo bwendelémo bwa lōsyo lwa Mbepo Mwikémo, uyu ikusuka abāndu mōsa. Kisita kuswīga uswe tukutoligwa ukuya nu bubōmbelo bwabubumbulusyo ubukulumba ni findu, kilipo ikindukimo kyātamisye pabuyobumo. Ikyēne yo Sétano, ātubwéne uswe panja tukugéla uku... .

⁸⁵ “Ena, uswe tukuyoba kilikyōsa kya ikyēne, abēne bisakusanuka ubwakipanga kyābo.”

⁸⁶ Kumbukilága, ugwe utikupepeka a Bakristi. A Bakristi bakafu. Abēne bo banyāmbála na bakīkúlu ba Kyāla, aba bikwimila Kyāla, kisita kupāsya iki aligwesa uyungi abagile ukuyoba. Ugwe utikufimbilisígwa ukubasuma abēne nukubapepeka abēne, nukubapaka ulūma abēne nukubapagata abene mōsa. Ifyo fyo fya pa nāsále, ifimela ififulugania, ikyēne kikaya kinunu napanandi, abēne batiskutwalámo siku nakimo.

⁸⁷ Kikūngumbúsya une, ukuya bo... Akēne lululu kikuyaga kabalilo ka kuluka fififūmbwa. Une ngētesisye utuyuni utunini umwisyugu, ukukilania kula, abatündúlu abanini bikupimbá ilyündu ukubūka mfififūmbwa fyābo. Akēne katikuyaga kabalilo akatali pāpo utwēne tukuyēngága ifififūmbwa, ukutēndéka utufūmbi twābo utunini ukupānja. Umwe mumenye, akayuni akanini kabagile ukuya nikififūmbwa kya mafúmbi, kangi akēne kabagile ukwitūgásya pa kififūmbwa kya mafúmbi kila, kangi akēne kikugasanusya agēne amaminiti manini galigōsa; kakwēga utulundi twāke utunini nukugasanusya agēne, nukwitugásya pala. Lilino, linga umwēne ikugaleka amafúmbi gala ukuya matalalifu, ukufuma pāpo agēne malūngúfu akabalilo kāmo, agēne gatisakupanja mma. Kangi umwēne itolo ikupululuka nukwākwéga ifyākyúlya ikīsúl’undumo nukugomokéla itolo pa gēne kangi.

⁸⁸ Kangi umwe mumēnye, injuni māma iyaiyolo yila, umwēne abagile ukwītugásya pala pa mafūmbi gala, nukugasanusya agēne amaminiti mabili galigōsa, kangi komma...na kópe ukwiyípa nu kusitakulya mpaka umwene ikuya ndondo fiyo umwēne ikutoligwa ukusōkápo pa kifūfúmbwa. Lōli penepápō, polelo, injuni māma yila yāgéné ni njuni nnyāmbála, amafūmbi gala gatisakupānja. Kali kyo kiliku, mūmo ugwe kūbatíla agēne, agēne gatisakupānja. Agēne gikwītugasyága mulamula nkifūfúmbwa nukubola.

⁸⁹ Kangi linga kālimo siku akabalilo akākúti Pentekosti ikufimbilisígwa ukufika palikimo nu Nnine, Yeso Kristi; 'nongwa yakuti uswe tutikwagamo nakamo lōli ikifūfúmbwa kīswile na mafūmbi amabole, bikupíka u Lwītíko, bikubükä mu Lukomano lwa Fipanga-fyōsa, nukukikōlélä ikyene findu fikulumba, ukwitūgásya kifuki na pāpa, nukuti "ikyēne kyo kyāmwambepo." Ngimba kitamisyé fiki ni kīsu, umwe bāndu ba kiPentekosti? Ngimba umwe mukamanya i Bāngéli lyāyobíle ifindu fila fisakubonekaga? Kangi uswe tukuywega panongwa yakuti aba baMethodisti kangi baBaptisti bikwingila, kangi polelo fyosa ifindu ifingi bo ifyo. Ngimba umwe mutikusyágánia ukuti akabalilo kāko abafünde abātúlo bikwīsa ukūla Mafuta, yila yāli yo sala yilayila u Mwegi ālisíle? Kangi abēne bakāgāgíle a Mafuta! Umwe mumenye, u Kunyakiligwa kwisakwīsa mbutītu fiyo, kangi nukusōkápo, utubalilo tumo, umwe mutisa nukumanya ikyene kikubōmbígwa. Ukwene kwisa kuti kukindle, kangi umwene mwisakuswīga iki kyābōmbígwe.

⁹⁰ Bo Yohani ālisíle pa kisu. Kangi abēne balinkuti ku Mwēne, balinkuti, "Ena, i Bāngéli lyāyobíle, Eliya ikufimbilisigwa ukwisa tāsi." Umwene alinkuti, "Umwene atalile īsíle, kangi umwe mukāménye ikyēne."

⁹¹ Momūmo ikyēne kisakuyaga, ilisiku limo, abēne bisakuyobaga, "Une ninogonaga iki kyāyaga pakuboneka bo kakāli a kabalilo ka Butolwe. Une ninogonaga u Kunyakiligwa kyāyaga ukuboneka pa buyo." Amasyu gikugomokela kunyuma, "Ikyene kitalile kiboniķe kangi umwe mukāménye ikyene." Uuhuu. Ukwene kubagile ukuya kwilile ukukinda mūmo umwe mukwinogonéla. O, lembuka, kipanga! Une kinunupo nkileke ikyo; une ngisako siku kuno panongwa ya kimanyisyo, une itolo ninogonaga une ngutikaga kila nkati itolo ukuti umwe mwābagile ukuya nakyo kila pa lubafu.

⁹² Kumbukilaga, nkundwe, Setano asikētīle i mbatiko inywāmu isi, ikipinga kimo kikugela ukukitola ikipanga ikingi, ikipanga-kipāgúke kimo ukugela ukukitola ikingi, ukwipilamo mosa ubusita kumanyila nukufimbilisigwa ukubapa abēne ingelo sya bufunda-minogono, ukuya nu mfunda-minogono ukungela u nnyāmbála bo umwene akāli akabūka mmigunda. Pentekosti! Umma, abo—abo—abo bakaya ba Presbeteri mma, abo bo baPentekosti. Ulugelo lwa bufunda-minogono

lukulōndigwa ulwa kibugutila kimo kwa baPentekosti, ikibugutila ikikulumba, bo abatumigwa babagile ukwega ukubuka panja.

⁹³ Bule linga abene bāli nu lugelo bo ulu? Abene bēgile u lugelo. Ulwene lwāli lugelo lwapentekosti ku bwāndilo, akabalilo kāko abēne bāgūlile nkyumba ikyapamwanya mpaka pala pālisile u Moto ukufuma pa Mwanya, kangi a Maka ga Kyāla. Lula lwāli lugelo.

⁹⁴ Komma u mfunda-minogono yumo ugwkīsu, anwfílémosinda īmíle pala ukugela ukutendeka i linogono, linga ugwe uli panini gwalutende, pamo ikindukimo, bikuti, “Ugwe gwe mōsa utoligwe.” Akabalilo kāko, ikyēne naloliloli kikusisimikisyu ukuti u nnyāmbála uyu yo nubumalikisyo gwamwambépo yo gwalutende, umwene ikufimbilisígwa ukuya mbwitügásye bula ukufika mu Kyēne. Popāpo mwaketa lelo umwe, muketile, kangi itolo ukōnángā iki Kyāla agelile ukubōmba ku fyinja fingi, nukugomokela pala ukusyungutila ni mbātiko syābo ni fyābo ifikulumba...

⁹⁵ Abene bikwīyúla akabalilo kāko abēne bikukēta ifilundilo fya bāndu bakomene palikimo. Bikuti, “Linga une nābagile ukubatendeka abēne bosa ukuya baAssemblies! Linga une nābagile ukubatendeka bosa bala baOneness! Linga une nābagile ukubatendeka bosa abene baMethodisti!” Aba Methodisti bikugela ukutendeka bosa abene ukuya baMethodisti, a baBaptisti bikugela ukukutendeka bōsa ukuya baBaptisti, abaPentekosti bōsa ukuya baPentekosti! O, ugwe ukabagila ukubomba nakimo ikyēne, Kyāla asūngwíle bala ukufuma ku lwālo lwa kīsu. Uswe tukufimbilisígwa ukulumbilila i Nongwainunu. Yo yene popāpo. Lōli, imbātiko syītu inywāmu, uswe tusōkilépo kisita Moto gula. Uswe tusōkilépo nukwítendekēla twībéné u moto untendekígwe-kukāya, mūmo ikyēne kyāyobeligwága.

⁹⁶ Kangi ikikomyunisti kyītu, lilino uswe tuli nulutende, ikikomyunisti kīnglémó nkati, “Ngimba kyo fiki kikubonekágá?” Lōli, umwe mumenye, ikindu ikikulumba kikaya kikomyunisti. Umwe unko une mbabūle umwe lilino, une ndikutíla ikikomyunisti.

⁹⁷ Loli kiliku iki une ngutila, umwe baPentekosti, ulu Ulukomano lwa Fipanga lo ulu lukwisa kukubéga umwe. Ikyo kyo kindu. Ikyēne kikubumbága ubung’wale bwa kinyamana, kangi umwe mwisakufimbilisigwága ukubükka mu kyēne. Panongwa yakuti umwe mwe kipanganio, umwe mukufimbilisigwa ukwingila pamo ukusōka panja. Ikyo kyo kindu, kangi u mündu aligwesa unnu, ugwmahala, ugwmwambepo amenye ikyo. Uswe tufumbilwe ubungi ubuketi bwa pamwanya-pa-sūmbi, uswe tukubwágá ubwene lilino. Kangi a baPentekosti bītu, itolo ukumila ikyēne,

imbēya, undisi, ni litēla, “Kyo kindu kikulumba kiki ikyene kisakuyaga!” Akabalilo kako, Methodisti, Presbeteri, gwaLuteri, ba kipanga kya Kristi, kangi baPentekosti, umwe mwisakufimbilisígwa ukupíka—ukupíka ikimanyiso kínu ikikulumba ikyabutumigwa, ukuti muye nkati mula. Abēne bisakufimbilisígwa ukubōmba kilakila. Umwe mutisakuya nakyo nakimo ikyakubombapo pa kyēne. Ikyēne kyo kyōsa ukulungisania na Roma, itolo katikati iki kisisimikisígwe. I Lisimbo lyāyobíle lulo.

⁹⁸ Ngimba fyo fiki fitamísyé na balúmbilílì aba bikwitikisyá ifindu ifi fifikége nkayílo aka, kisita kubasoka abāndu? Kyâla isakulálusyága ku maboko gâbo. Munomuno nkabalilo ka butolwe, abēne bâli mbutolwe, abēne bâli. Ikikomyunisti kitikwîngíla nkati; ikyêne kyo Lukomano bwa Fipanga kisakumíla ikipanga kyôsa. Kangi kumbukilágá, akabalilo kâko umwe mukuyoba, “Kitisa...” Ikyêne kikuboneka, polelo ikyêne kisakuyaga kikâbile fiyo. Umwe mubômbile mwéngíle ubungw’ále bwa kinyamana. Umwe mwéngíle ku kyêne akabalilo kala.

⁹⁹ Ugwe kinunupo fikaga kûko ugwe ubagíle ukusôkáko ku kyêne lilino, ena, nkulumba, yaga mfungígwé mu Kitangalala kya Kyâla. U Mbili gwa Kristi go Mbili gwambutítu gwa Kristi, ugu gôsígwé nkati mu Kyêne ukwisila mwa Mbepo Mwikémo; komma ukulungisigwa mu Kyêne, ukwéngígwá nkati mu Kyêne, ukuyoba mu Kyêne, ukuyoba-mu-ndumi nkati mwa Kyêne, ukuywega nkati kya Kyêne. Ugwe upâpígwé nkati mu Kyêne, ukwisila mwa Mbepo Mwikemo. Uko ko kutalusya. Naloliloli.

¹⁰⁰ Lilino uswe tukukêtésya ifindu ifi, ubutolwe bukwisapo nakalinga itolo. O, u möhési alinkukéta pamwanya nukuti, “Uu-huu, abēne babükíle mbupâgúke pa bukino, abēne bali itolo panja pala bikunyela-nyela, ukuywéga, ukuya na kabalilo akanywâmu. Umwe mumenye fiki, lululu ulu ko kabalilo kangu akakubamilisya abene. Une ngubapyanikisyaga abēne lilino.”

¹⁰¹ Popâpo umwene alinkufyûka pamwanya pa kâmba nukwânda ukupûta umuyi gwa kitânda gwâke, whuu: “Amasiku ga fika gakindile. Mulimosa, une ngwitika abându aba bâluténde itolo. Une ngwinogona abēne babagíle ukuya nu—nu—nu lugelo lwa minogonelo bo abēne bakâli nukwéga imigunda gyâpánja.” Bapentekost! Uu-huu. Kéta ikitânda kyâke kikugoga i Lisyu, “O, une ngwinogona Ikyene kyo kindukimo ikingi, une—une ngwitika ikyene...” Muketile, ukubûka kulakula ukatalula ukugomokela bo fyôsa ifingi ifipanga-gipâgúke fyâbômbile, ugo go itolo katikati nsebwé abēne bikwênda. Abêne bisa, ikyêne kisakugoga ikyêne. Isala yilayila ugwe kupângânia ikyêne, kila kikugóga ikyêne. Ikyêne akabalilo kôsa kibômbile. Ikyêne akabalilo kôsa kisakubômba. Ikyêne kitisakusumukâmo kangi siku. Ikyêne kikamanyigwâmo siku mu syâmbukûlu. Mu—mu Ngulilo ya Kipanga kya Laodicea, Kristi âbikígwé pânja,

ikukung'usya, ikugela ukwingila. Kangi abene bakabagila itolo ukwimikana nakyo Ikyene. Abene bikutoligwa ukupilikisyá ku Kyéne. Lilino uswe tukwaga, isala iyi uswe tukwitugasyámo, ubutolwe bukwíngíla.

¹⁰² Kangi polelo uswe tukwânda ukusyâgánia, ifíka fitikubonéka kangi mma, mûmo ifyéne fyâli. Ababíne bikubûka ku kâya babíne. Ikyéne kikáya panongwa ya Kyâla. Ikyéne kyo panongwa ya kisítakuyápo kwa luyígo pakati pa bându. Lukayápo nalumo uluyígo. Abëne—abëne bikwitügásya nukupilikisyá; ukubûka kukâya, bikuyóba, “Mulimosa, une ngusakikisyá kila kyâli kinunu itolo. Uu-huu.” Muketíle, kukayako nukwîyúla mma. Kikayapo ni kindukimo kila mu bându iki kibagile ukuyapo pala.

¹⁰³ Une ngukumbukíla ifyinja kalongo na fihano ifi fikindíle, kuno me Arkansas, akabalilo kâko une näyága na kakomano akanini pamwanya pala ku Jonesboro, akabalilo kâko kifuki abându maelifu malongo-mana bikugela ukuyapo pa iki, ukwissa ku lukomano ku kâya ka bandu kifuki maelifu kalongo-na-ihano. Kangi abëne bâlambaléle pâsi pa magali gakupimbila amasapa na filifyosa ifingi, nukukoleléla ifikalatasi pamwanya pa bâna bâbo ababíne, itolo ukuti bafike nkati. Abëne bâlitügésye mfikota fyâbo kangi balinkusita kusôkápo, pamûsi na pakilo, kangi babatumaga abaganígwâ bâbo ukubûka ukwakwéga unkati-gwa-ngulube ni—ni supa ya kyâkúnwa; nukusyala pala, ukwanda kwa lisiku nu kumalîsyâ kwa lisiku, ukwânda kwa lisiku nu kumalîsyâ kwa lisiku. Indumbula syâbo syâkyága, pa moto. Itolo pabunini fiyo ikindu ikinini Kyâla âbômbile, ikyéne kyâbabikíle abëne pa moto. Kangi ba mia ba bëne bâlisile mula.

¹⁰⁴ Umwene akáli yo Kyâla yulayula, ikilo iki, kîkyo Umwene âli ifyinja kalongo na fihano ifi fikindilepo. Umwene akáli yo Kyala yulayula, ikilo iki, iki Umwene âli akabalilo kâko Umwène âpelíle kumwanya na pâsi.

¹⁰⁵ Lôli kyo fiki ikyéne? Uswe tuli nabo bôsa bikwîyúla kangi bâlondágâ ukuyenga ifipanganio fyítu, balöndíle ukuyenga *iki*, kangi ukuyenga *kila*, kangi ukutendeka ikindukimo ikikulumba kangi kimulike, ukufwânikisyá na baJones, na baMethodisti, na baBaptisti, naPresbeteri. Umwe mukaya bo abëne. Umma, umwe mukaya. Abëne bo bându bafipanga-fipâgûke, iki kyo kili kanunu môsa, nakimo ikyâkulwana na bëne. Balipo ba bîngi a Bakristi banunu panja pakati pa bëne, lôli ugwe utikulöndigwa ukwîbanilila gwimwene ni fibugutíla ifisitakwitika fila. “Abandu aba bikukana a Maka aga galimumo,” ugwe ukabagisania ukwéga ulubafu na bëne mma.

¹⁰⁶ Umwe mumenye, ulutamio lwa ikyéne lo lwakuti, ugwe kugela ukutwâla Hollywood nkipanga. Ikindu kyene iki

ugwe kufimbilisiga ukubomba ko kusōsyia Hollywood panja pa kipanga. Muketile? Umwe mukugela ukutendeka ikiyumba kyīnu ukuya kimogi, umwe mukugela ukutendeka ikipanga-kipāgūke kyīnu ukuya kinywamu fiyo, mpaka ikyene kisakukwabāga ukukēta kwa bāndu. Uswe tukabagila ukubūka kula ku lubafu lwālo. Uswe tukufimbilisīga ukuya nabo ku lubafu lwītu. Kilikyosa iki kikumulika, kumbukilaga, Hollywood ikumulikamulika nu bwankīsu, akabalilo kāko i Nongwainunu yikwēluka mu lwyūfyo. Kulipo ukukindana ukwingipo pakati pa kumulika nu kunyeka. I Nongwainunu yikunyeka mu lwyīsyo, kangi mbololo, kangi ulwiyufyo, kangi amaka. Akabalilo kāko, Hollywood ikumulika, kangi aligwesa ikulata nu kuywega, kangi ukubūka ku kyēne. Muketile? Uswe tukafūmbwa ikyo mma.

¹⁰⁷ Uswe tukulōnda ukwitugasya u Bwēlu bulu. Umwene āyobile, “Umwe mwe mūnyu gwa kīsu.” “Linga u mūnyu gutāgile ubōnje bwāke,” ago go máka gāke mu Nongwainunu. Uswe tubagile ukuya nakyo ikindukimo kikwēnda mfipanga fyītu, ifi a baMethodisti, abaBaptisti, abaPresbeteri, na bōsa ba abēne, bisakunyonywāga ukwīsa. Uswe tukufimbilisīga ukuya bāmūnyu! U mūnyu gukutēndéka ikyūmīwa, gukupéla ikyūmīwa. U mūnyu bo bōnje, linga ugwēne gukupalamasya. Ugwe gubagile ukupalamāsīgwa.

¹⁰⁸ Kangi uswe tukusyāgānia, amatāti gītu amakulumba gikugéla ukufwanikisania na baMethodisti na baBaptisti, ni miyumba iminywāmu, na mabuyo amanywamu, na bāndu abanunu abamanyi, kangi i sukulu ingulumba na makoleji amakulumbapo, na filifyōsa bo ifyo. Uswe tusōkilépo ukubūka ku matati, kangi apa ulutamio lukwingilámo.

¹⁰⁹ Kangi i linogono lyāmwambépo likukētesya ukusyūngūtila nukuyóba, “Apa, gūlila i miniti, ngimba uswe twesa tukufimbilisīga ukwega u Bumobwene bwa Fipanga búla? Ngimba ikibugutila kyītu kyōsa kisa kubūka mu kyēne?” Naloliloli, umwe mukubūka. Ikyo kyo katikati. Umwe kētēsyā kangi kēta linga umwe mutikubóbma. Ili Bāngéli lyāyobile umwe mukubōmbāga, katikati, kangi Kristi ikuyága pānja. U mwēsi gwālisimísyē gwēne pankyéne pa pāpa (ugwākwāndámō siku ābükile ku Roma), ikilo kimo, ukukunāngísyā ugwe ikimanyilo mu myānya. Kisakusakikisīga, ikyēne gwabōmbile ikyēne. Mūmo u Ntwa ikubōmbela ifindu ifi mulisiku ili, kyākuswīgisyā!

¹¹⁰ Polelo mu sala ingulumba iyi iya ngīsi, akabalilo kāko abēne bāli kula, imibelo gilinkwisapo. Isūbilo syōsa isyakuponesīgwa syākindile. Lilino ngimba ugwe kubombaga fiki linga ikibugutila kyako kikubūka mu Bumobwene bwa Fipanga? Ngimba fiki fikubonekaga akabalilo kāla ku fyōsa ifindu fyītu ifikulumba ifi uswe twāyengile apa pa kīsu, u lusūbilo ulwabumalikisyō lukindile?

¹¹¹ Lōli umwe mumenye, bo abēne bo bali kifuki ukukúta, kangi isübílo syōsa syākindíle, abēne bakābagíle ukupokígwa; kangi nakalinga itolo, abēne balinkumbóna Umwēne ikwisa ikwenda pa mīsi. Mu sala ya ngīsi, Umwēne alinkwīsa, ikwenda mula.

¹¹² Umwe mumenye fiki? Akabalilo kāko Umwēne abālekíle abēne, Umwēne āmenye ikyo kyāyága pakuboneka, popāpo Umwene alinkufýuka akāmba akatali ukukinda aka kālímō nkīsu kila. Pamwanyapo fiyo ugwe kubūka, pabutalipo ugwe ubagíle ukukēta. Kangi Umwēne alinkufýuka mmwanya ukuti Umwēne ābagíle ukubakētésya abēne, umwe mumenye.

¹¹³ Kangi Umwene āménaye iki kīságá. Umwēne asakikísye ilisiku ili ukuyako apa. "Mumo ukwene kwāyilíle mmasiku ga Sodomu, momumo ukwene kwisakuyilaga mu kwisa kwa Mwanundumiana gwa mündu, akabalilo kāko u Mwanundumiana gwa mundu ikusetuligwa." Polelo, u Mwanundumiana abagíle ukusetuligwa. Ingulilo īmbíbi niyabulogwe iyi yisakulōndesýága ikimanyilo. Iyēne yisakuya ni kimanyilo kimo. Iyēne yisakukána ikyēne mūmo abēne bābōmbíle akabalilo kála, lōli ikyēne kisakuya kimanyilo kya busyuke. Umwēne akāli mūmi, ikubōmbela mūmo Umwēne ābōmbíle.

¹¹⁴ Uswe tukusyāgánia, ukuti mu sala ingulumba iyi, abafündígwá bála bōsa mbutolwe, Umwene alinkufýuka mmwanya ukuti Umwēne abāgíle ukubakētésya abēne. Umwene ālitugésye pala pa kamba, ikubakētésya abene.

¹¹⁵ Kangi lilino Umwēne akāfyūkíle ikyāmba akabalilo aka, lōli Umwene āfyūkíle ukufuma mwipūmba, ukufýuka ukukinda mu mbepo, ukukinda u mwesi, indondwa, mpaka Umwēne ābūkíle mmwanya fīyo mpaka Umwēne ābagíle ukukēta pāsi ukukēta ku Mwanya. Kangi pala Umwēne ikwītugásya, pa Mwanya. Lilino ikisige Kyāke kili pa tündúlu, kangi une mmenye Umwēne ikukētésya uswe. Umwēne ikukētésya.

¹¹⁶ Kangi papapa apa mu sala iyi ya ngīsi, akabalilo kāko ifipanga fyōsa fibükíle mu mbātiko ingulumba, kangi abēne bali nu lubatíko ulu kangi ulubatíko lula, fyōsa fibatikigwe mōsa bo fifipanga ifingi fiyilíle, ifipanga-fipāgúke. Kangi kyo fiki iki kyāboníke? Mu sala ya ngīsi, akabalilo kāko abāndu bīsusígwa-na-mbepo abanaloliloli bikuswīga, "Kikubonekaga fiki? Keta ku bana bangu!" Unnyambala ikuyoba, "Keta ku nkasi gwangu! Keta pa iki!"

¹¹⁷ Kangi abēne bikulundusya ulwa Pandungu, pamo lwa Pakitatu nkilo ulukomano lwa lwípúto, nakalinga, ukuti abēne babagíle ukwakuketelela *Uswe Tunganile Sucy*, pamo ikindukimo bo ikyo, pa senema. "Bagana ba kīsu, ukukinda ukuya bagana Kyāla." Ukubōmbéla ngati bēne.

¹¹⁸ Une nālimbulíle unkikúlu yumo ilisiku limo, umwēne āfwēle ilidiresi lyāke ilifinyu fiyo. Une ndinkuti, "Kalumbu, ilidresi ilyo

lifinyu fiyo. Ikyēne kibagile ukusita kupilikígwa kanunu ukuti une ngubûle ugwe ikyo, lôli ilyéne lifinyu. Ugwe gwe Nkristi, kangi ugwe kupelaga ikyakwitabaniamo.”

¹¹⁹ Umwene alinkuti, “Ena, Nkundwe Branham, ugwe umenye fiki?” Umwene alinkuti, “Ilyo lyo luko lwène abême bikutendeka.”

¹²⁰ Une ndinkuti, “Abême bakâli bikulísyâ ifyômbo, kangi abême bali na makina gakusónela. Lukayapo nu lulèyèlo.” Ena.

¹²¹ Pilikisya, unko une ngubûle ugwe ikindukimo, mwinangu mpala. Kisita kukusalapo ugwe. Umma, nkulumba. Une ngugela ukukyunga ugwe ukusôkâko ku butolwe. Akabalilo kâko i mbepo yila yili mwa ugwe, ugwe kubômbâga ikyêne. Uko ko kutalusya. Ugwe kufimbilisígwa ukupâpígwa ukusôkâmo mu kyêne. Lilino ugwe ubagîle ukwifwanikisya gwimwéné pa masyu ago, lôli unko une ngubûle ugwe ikindukimo, muketile, “Iki indumbula yako yili, kula ikyuma kyâko kyôpe kili.”

¹²² Unko une ngubûle ugwe. Ugwe ubagîle ukuya mwelu itolo bo kikala kwa ndumego, kangi ugwe ubagîle ukuya itolo mwelu bo kikala, ndindwana nkeke, ku mwinako u ndumiana, lôli ilisiku limo Kyâla isakukutendeka ugwe ukwâmûla panongwa ya kusulwa ubulogwe. Ugwe utobesigwe akabalilo kâko ugwe kufwâla bo lula. Yeso aatile, “Aligwesa uyu ikuketa ku nkikulu ukunnyonywa umwene, abombile ubulogwe nu mwene mu ndumbula yake.” Kangi akabalilo kâko u nnyâmbâla yula ikufimbilisígwa ukwamula, untilwanongwa yula, panongwa ya kukéta pa ugwe, panongwa ya kusulwa ubulogwe, ngimba yo ywani âkitwéle ikyêne ku mwène? Inogona isya ikyêne. Umwe bakikúlu ba kiPentekosti, isóni pa umwe! Muketile? Isóni pa umwe!

¹²³ Une mbaganile umwe, iyo yo nongwa une nguyoba ikyo. U lugano lugolosyi.

¹²⁴ Uswe tuli pa matata amakulumba, amatata ga bufwalilo amakulumba. Ikyêne kili itolo bo, kangi kitendekesígwe bo kîsu. Umwêne alinkuti, “Ukugana i kisu mma, pamo ifindu fya nkîsu; linga ugwe kubômba, u lugano lwa Kyâla lukayamo na mwa ugwe mma,” Une ndikupâsyâ ugwe kuyoba kalinga mu ndimi, ukunyela nyela, ukumoga, ukutumula inywili, ukufwala amadiresi bo ulo. Ugwe nnyâmbâla kwitikisya ikyêne. Ifipaso fyâko fyêne fikukubûla ugwe kûko ugwe uliko. Uko ko katikati kutalusya. Kisita kuswîga uswe tuli mbufuluganíke bo ubu uswe tulimo, kangi tukumalikisya mu kikomyunisti, imibelo gya kipangapanga, imibelo gya kipanganio kyâbumobwene!

¹²⁵ Akêne ko—akêne ko kabalilo ka kulungisania, akabalilo ka kubungânia. Imibunganio gikubüngânia abapambombo, ukûmâna ukufwana ni kyêne. Ifisu fili nakyo i—i United Nations, abême bikwibüngânia. Ifipanga fikwibüngânia palikimo. Ngimba ikyêne kikunângísya fiki môsa? Ikyêne

kikunāngísyá ukuti Kristi nu Nsīngilígwá bikwitendekesyá ukulungisígwa. Ikyo kyo iki ikyéne kikuyobelapo. Gyōsa igi imisyūngúlu gya findu gikunāngísyá ikyabwanaloli kikwísa. Ketesyá lilino akabalilo kako uswe tukwigala, panongwa yakuti une negile isala indali fiyo.

¹²⁶ Kangi lilino kétésya, mu sala ingulumba yila akabalilo kāko ulusübilo lōsa lwākindíle, ulwa kuponesígwa, abēne balinkumbona Yumo ikwisa, ikwenda pa mīsi, ikusegelela. Kangi i kindu, ikiyabo ikipela busulumanie, pilikisyá kifuki, ikindu kyéne iki kyābagíle ukubatula abēne, abēne baktílágá. Abēne balinkuti, “Ikyéne kikuboneka mbusyukasyuka. Ikyene lumo kili, umwe mumenye, kisyúka.”

¹²⁷ Linga ikyo kikaboneka kāngi u mwisyúgu! Abēne bikukitíla Ikyéne. Abēne bikutíla ubulágúsi, abēne bikutíla u luko lumo lwa maka ga mōhési; akabalilo kako Yeso āyobile Ikyene kisakubonekaga mu lisiku ili. Ikindu kyene iki kibagile ukubatúla abēne yo Yeso Kristi. Komma ikipāngā-kipāgúke ikīngi, komma ukuti bōsa bīlungisyegé palikimo; ikyo kyo itolo kikubukága ukutendeka ikyéne kinalipo ukukindamo siku. Ikindu kyéne iki kibagile ukukutula ugwe yo Yeso Kristi.

¹²⁸ Kangi akabalilo kāko Umwene āfingile ukugomokela ku masiku ga bumalikisyó, mu luko ulu, kangi ukubomba sisísi, ukufíngá (ukufwana itolo bo akāli u mwanundumia umfingígwé ágomokíle kwa Abraham, imbeyu yakwánda) uluyungu lwabunyafyale lwa Abraham, Yeso ābagíle... āyobíle ābagíle ukukéta ikindu kilakila. Bo akāli u Mwanundumiana umfingigwe, Kyala ābagíle ukwibonesya Mwene mu mbili kangi ukubomba bo yu Yeso ābōmbíle, bo mūmo Umwène āyobíle Umwène ikubōmbága, itolo mūmo āyobíle fikubōmbeligmága mmasiku ga bumalikisyó. Kangi apa ifingo syósa sila, isi uswe twābagíle ukwála isyéne pānja, mwa bakalongo-na-babili, papapa apa pankyéni pa umwe, ukuti iki kibagíle ukuboneka pa buyo.

¹²⁹ Kangi ifipanga, ifi fibagíle ukuya na maboko gabálulígwé pānja, ukwambilila Ikyéne, “Une ngutíla panini isya Ikyo. Ikyéne kikaya kya kibugutíla kyítu, muketile.” Kangi abēne bikukitíla Ikyéne. Ikindu kyéne iki kibagíle ukubatwala abēne kwa Kristi, yo Kristi Mwene, kangi abēne bikutíla ukuti Ikyéne kyakutilísyá. “O, une ngamanya. Ikyo lumo kyamisyúka, ugwe uketile. Kangi une ngasimanya isya Ikyéne.” Ukutila ikindu kyéne iki kibagíle ukubatula abēne.

¹³⁰ Kangi mu sala iyangísi yila iyabutolwe, abasaligwa ikipanga kila, ikitibugutila kila kítügésye panja pala, ukutíla ukuti ikyéne lumo kyáli kyamisyúka, abēne bakálondágá ukuya nakyo nakimo ikyakubomba ni kyéne. Polelo likwisa i Lisyu ilinoge lila, “Komma ukutíla. Yo Une.”

¹³¹ Umwene yo Lisyu, bule Umwene? Umwene atikwandukamo siku, ukuya Lisyu. Lilino ngimba ugwe ukabagila ukupilika i Lisyu likuyoba, ikilo iki, “Umwene yo yulayula mmayolo, umwisyúgu, kangi bwilanabwila. Komma ukutila; ikyéne yo Une”?

Tuli namisya uswe imitu gyitu.

¹³² Táta Gwakumwanya, a—a mayolo gapile. Isala syangísi, mûmo fikuti u Moto gusókilépo pa kigémo. Ugwe kubungania ukukilania mu ngunda. Ugwe gwâybóbile, “I Kitangala kili bo u mündu uyu ályégíle ulwelo nukubúka kwa súmbi, ukutágá ulwene mula, kangi bo umwène alutwele ulwène panja. I Kitangalala kyáli bo lula.” Ntwa Kyála, ilisiku limo iswi yabumalikisyó yila iyi yili mmísi! Ugwe gwâybóbile, “Abéne bâkólile u luko lôsa.” Ulwelo lwa Nongwainunu lula lukukóla uluko lôsa; ulwene lwâkolíle abakayamba, iswi-mwafula, imibûbi, imiyoka, iswi-syâmino. Uswe tukamanya iki ikyéne kikukóla, lôli syalimo iswi simo mula Ugwe gwasikóngága. Ugwe gwe Yumo uyu yo Ndongi. Lôli uswe tukusyagánia, nakalinga abakayamba, iswi-mwafula, na syôsa, sikugomokela ku bwina-matipa kangi, ukugomokela ku mîsi. Lôli ilisiku limo iswi ya bumalikisyó yila iyi yásungulígwe, yamanyilígwe-ngâníla ukwîsa, ikiyabo kyabumalikisyó kila ikyá Mbili, kisakukwabigwágá ukufuma mwa súmbi.

¹³³ Ugwe gwâsopíle u lwêlo mmasiku ga Luteri, na Wesley, Alexander Campbell, John Smith, Calvin, Knox, Finney, Sankey, bo abo; mu ngulilo ya kiPentekosti, amasiku ga F. F. Bosworth, na Frochman, abanyâmbálá abakulumba bala. Ugwe gwâsopíle u lwêlo, mmasiku ga Billy Sunday, ukukindilila ukukinda i ngulilo.

¹³⁴ Kangi lilino Ugwe ukâli kupesa ukukinda mwa súmbi. Ngimba alipo pala yumo gwa bêne itûgésye muno ikilo iki, Ntwa? Linga ikyene mo mûmo, abene babagile ukuya bo nkikulu unnini ku kisiba. Pópe mu kayîlo kabulogwe kâke, umwène pópe âkwagénie ukuti Ugwe gwâli Mesiya. Umwène akibwène ikimanyilo kila. Ikyo kyáli ikyéne. Umwene alinkuti, “Une ngusyágánia Ugwe gwe nsololi.” Umwene akâli na minogono nagamo ukuti ikyene kyâbagíle ukuya Mesiya. Umwène alinkuti, “Uswe tukulondalonda u Mesiya,” mu masyu agângi. “Uswe tumenyé akabalilo kako Mesiya ikwisa, Umwene isakutubúla uswe ifindu ifi.” Kangi Ugwe uyobile, “Une ne Yuyo.” Ikyo kyáli ikyéne.

¹³⁵ Lilino, ikilo iki, Ntwa, unko abéne bakête ikyo, “Ikyéne yo Une; mungayaga ba lutende. Ulwène lo lufingo Lwângu.” Bumbulusyága ababíne, Ntwa, pokaga abasobi, isusyaga abasitakandu.

¹³⁶ Tulusôkangápo uswe ikilo iki, nukuyoba mu ndumbula syítu, bo uswe tukusôkápo, bo bala aba bafumile ku Emmausi,

“Ngimba indumbula syītu sikāpyága nkati myītu bo Umwene ālumbililága kwa uswe ikilo iki mu kiyumba, u Kuyapo Kwāke u Kwākyála!” Mūmo abēne bamanyíle ukuti ikyēne kyāli Ugwe, abēne bākukōlile Ugwe mula kangi amāso gābo galinkwigúka. Tukusuma aligwesa gwa uswe, ikilo iki, tukukōléle Ugwe nkati. Linga uswe tutikupilikisya Ikyēne, tulikukōlélága uswe Ugwe nkati, mulimosa. Iyo yo njila yene Ugwe ubagile ukwisetulaga Gwīmwéne.

¹³⁷ Kangi uswe tukukētésya mūmo Ugwe gwālisetulíle Gwīmwéne ukufuma pa busyuke Bwāko, Ugwe gwābōmbíle ikindeukimo mu njila yilayila Ugwe gwābōmbíle bo kukāli ukukōmelígwa Kwāko. Lilino isaga ikilo iki, Ntwa, Ugwe uyobile gwāli “yulayula mmayolo, umwisyugu, na bwilanabwila.” Bōmba kāngi, kuli uswe, mūmo Ugwe gwābōmbíle mmasiku gāgo Ugwe gwālimíle apa mu mbili, pa kīsu. Uswe twisakubükága ku kāya, tupepusígw’indumbula, ukufwana na bala. Mu Ngamu ya Yeso uswe tukusuma. Ameni.

¹³⁸ Lilino ndukomano, ikilo iki, une mmenye ukwene kulungwíle fiyo, kangi uswe tuli nago amaminiti malongo mabili itolo ukuti tusōke nkabalilo. [Ubuyo busitakandu pa tepi—Nsimbí] Une ne . . .

¹³⁹ Une ngabagíla ukwīmíka pamo ukupīnga i findu ifi une ngubōmba. Une ngugūtigwa ni Kindukimo, une akabalilo kōsa ngubōmba, ubūmi bwangu bōsa, kangi Ikyēne kyo akabalilo kōsa kitalusye. Ikyēne kikāmbulámo une nakimo lōli iki kyāli i Bāngéli. Une ngabagíla ukwimika ikyēne. Une ngabagila ukubōmba nakimo ikya ikyēne. Ikyēne kikubōmba itolo ikyēne, mulimosa. Kangi une nsisimikisye, linga une ndigwakupilikíla, ālipo u munduyumo uyu ikufumbilwa ikyēne. Kangi une nguyaga nsūbilígwa. Kangi ku Lisiku lila, une ngulonda, ukuya bo Mwikemo unkulumba Pauli āyobile, “Nalimo nililopa lya mundu pa kiboko kyangu.” Huu-uu. Une—une ngulonda ukubabúla umwe Bwānalóli. Komma ukuya une . . . Une mbaganile umwe.

¹⁴⁰ Kangi linga ugwe gwāli nu ndumiana unnini . . . Lilino inogona isya ikyēne, nkikúlu, ugwe yūyo une nākumanilága pitasipo, umwe bakalumbu ni nywīli indumuligwe ni findu. Linga une . . . Linga ugwe gwāli nu ndumiana ummini itūgésye panja pa lukindi, kangi ugwe gwāyobíle, “Gwemwāna, gwempala, ugwe kinunupo gwingíle muno, gwempala. Ikyēne kibagíle ukuya, une ngamanya, abēne lumo bisakwendesýága amagali ukusyungutila ugwe.” Ugwe ukangana umwanike yula. Uko ko kutalusya. Ugwe kubükága panja pala nukupuyula ikipapa ukufuma ku mwēne, pamo ukuntendeka umwene ingile. Uko ko kutalusya. Ugwe unganíle umwēne.

¹⁴¹ Iyo yo njila iyi i Nongwainunu yiylílile. Kyala akuganile ugwe. “Kangi bala aba Umwēne abaganíle, Umwēne

ikubakomamo nukūmaníla umwāna aligwesa uyu ikwīsa ku Mwēne." Linga ugwe ukabagila ukwikasya ukukomigwamo, ugwe kusōkápo kangi kuya nkalale ukufwana ni kyēne, polelo ugwe gwe mwāna nsigwana, umwe mukaya bāna ba Kyāla. Polelo itolo kumbukilaga, ilyene lyo itolo Lisimbo.

¹⁴² Lilino i lisyu ukufuma kwa Mwēne, ilisyu limolyene, lisakusanusyaga ukukinda iki une nābagíle ukuyoba, akabalilo ka būmi elifu-elifu. Ikyēne yo Mwēne. Uswe tuménye ulufingo Lwāke. Uswe tumenyé iki Umwene afingile ukubomba. Lilino une ngamanya ukuti kali...ngimba...uswe tukufikaga ku...

¹⁴³ Ngimba umwe āyabénie amakadi? Ngimba ugwe gwāyabénie amakadi umwīsyúgu? Ngimba ikyēne kyāli fiki? J, umma ndaga. Umma ndaga, ukuponesya akabalilo, unko uswe itolo twānde pa mbalilo ya yimoyene. Lilino, abēne lumo bali mōsa mu kiyumba. J, mbalilo yākwānda.

¹⁴⁴ Kangi lilino uswe tulinasyo ingābisyo. Uswe twālyāndíle ukufuma, akabalilo kamo, ukufuma pa *iki*, pa kabalilo, ukubūka nu kugomoka kumo, nukusyungutila, lōli uswe tulinkuya na bēne ukukābila ukusyungutila apa. Lōli abāndu balibōsa aba bikwingila muno, ilisiku liliyosa, bali nu lusako ukwisa mu bubambe. Ikyo kitikusanusya ukuti ugwe uli apa...

¹⁴⁵ Balinga bamenyé, ndukomano ulu, bālipo kifuki kabilikosa bu bwingi bābumbulusígwe mula nkilundilo, bo bābo bābumbulusígwe pamwanya apa? Naloli, umwe mumenye ikyene. Muketile, i likadi lya lwīpúto lyo itolo ukubatwala abāndu pamwanya apa, ukutwāla Mbepo Mwikemo pakati pa bēne, bo mūmo umwe mwisibíle ukubomba ikyo. Uswe tutikulondigwa nukuya nalyo ilyēne lululu ulu. Uswe tubagíle ukusōsyápo a makadi ga lwīpúto.

¹⁴⁶ Itolo mūmo uswe twābōmbíle ikilo kyāmmayolo, uswe tukālimo siku na makadi ga lwīpúto nkilo. Mbepo Mwīkémó āsökíle ukubūka pakati pa bēne aba bakāli nago amakadi ga lwīpúto. Kangi une nāfibwéne ifindu fingi une ngāyobilépo nakimo, 'nongwa yakuti une ngāménye kali ikyēne kyāli momūmo pamo mma. Ikyēne kyākāli kyālyumilisye ingisi pamwanya pa bēne, kangi une ndinkukileka kyene itolo. Une ngāménye. Kikayaga pakubōmba ubununu nabumo ukuköléla abēne. Kilikyōsa iki Umwene ikuyōba kyo kitalusye, popāpo pilikisyá iki Umwēne ikuyoba.

¹⁴⁷ Lilino ngimba ugwe gwatigi āli J? J, mbalilo yakwanda? J, mbalilo yakwanda. Ngimba ywani ali ni likadi lya lwīpúto? Fyusya ikiboko kyāko. Ugwe ubagíle ukuti usobíle, mwanundumiana; kubagíle ukuya kimo...O, une nsobíle. O, kubutali kula kunyuma kubwakibumba ku nyuma. Isaga apa, nkikúlu. Abene—abene bikusosyaga itolo lilino, undumiana uyu, u Nkundwe Borders pamo Billy, yumo, utubalilo tumo bosa babili, ukufulugania amakadi gala pankyení pa ugwe, kangi

polelo ukukupa ugwe ilikadi lyāko, lililyosa ili ugwe kulonda. Uswe tukamanya, agēne go itolo... *Uyu* abagile ukwega i mbalilo yabuhano, kangi *yula* ikwēga i mbalilo yabuhano-ni-yabubili, *uyu* ikwega i mbalilo yakalongo-ni-yabuhano, kangi *yula* malongo-mahano-na-mana-ni-hano, kangi uswe tukamanya. Kangi polelo, kangi, akabalilo kāko une ngwisa, une itolo, paliposa ikyēne kikuya pa ndumbula yangu, une nguköléla ukufuma pala, kisita kupasya pāpo ikyēne kili. Une itolo... Linga une nguyoba... Utubalilo tumo une ngubala balinga mu bubambike, kangi ukuyabania ikyēne na bābo pa bubambike ubu nukwaga ilyāmúlo. Muketile? Kangi polelo, linga une ndikubömba, fiki, une itolo... kilikyōsa kikwīsa ku linogono lyāngu ikyakwanda, une nguköléla.

¹⁴⁸ Mbalilo yakwanda. J, mbalilo yakibili. Mbalilo yakibili, mbalilo ya butatu, mbalilo yabuna, mbalilo yabuhano, mbalilo ya ntāndàtu, yabuhano na sibili, yālwéle, yabuhano na sina, yakalongo, unko abēne bīse, muketile. Yimo, yabubili, yabutatu, yabuna, yabuhano, ntāndatu, yabuhano na ibili, lwēle, yabuhano na sina, yakalongo. Ikyo kyo kinunu. Iyo yo njila, isaga itolo... Gūlīla, yumo ābūkile injila iyengi. Une nāli... Yimo, yabubili, yabutatu, yabuna, yabuhano, yantāndatu, yabuhano na ibili, lwēle, yabuhano na sina. Uko ko kutalusya. Lilino, apa, apa ikyēne kili, kalongo. Umma ndaga.

¹⁴⁹ Kalongo na yimo, kalongo na ibili, kalongo na itatu, kalongo na ina, kalongo na ihano. Abo bo bahano ukongelelapo. Yumo, babili, batatu, bana, bahano. Kinunu, ikyo kyo kinunu.

¹⁵⁰ Kalongo na ntāndàtu, kalongo na ihano na ibili, kalongo na lwéle, kalongo na ihano na ina, malonga mabili. Yumo, babili, batatu, bana. Une ngubabona bana bēne. Malongo mabili, ngimba malongo mabili āmwíle? Umma ndaga. Lilino, uswe tutikulonda ukwega bingi fiyo bimile akabalilo kamokene. Lilino linga uswe tukumālisya na aba, kangi ukwēne kwāndéne ukufwāna, uswe tukubükága ukwēga bamo abakōngeléla. Uswe tutikuköléla... Lumo uswe...

¹⁵¹ Unko uswe tugéle abanandi ukōngelélapo. Unko uswe tugéle bahano ukongeléla. Malongo-mabili-na-yumo, ukubuka malongo-mabili-na-bahano, mwa ba J, unko abēne bīme linga umwe mukulónda. Malongo-mabili-na-yumo, ukubuka malongo-mabili-na-bahano. Yumo, babili, batatu, kubutali kunyuma mula munyuma, bana. Yumo, babili, batatu, bana, uyo yo bahano. Popāpo, lilino unko uswe itolo twīme apo. Balipo malongo-mabili-na-bahano mbubāmbe, kangi abēne—abēne bikubāmba pāsi apa.

¹⁵² Lilino une ngubasumaga umwe ubutuli bumobwene. Ngimba umwe mukumbaga une ubupilikisyé busitakutapulania... Mpapo Kyāla ubupilikisyé busitakutapulania, ku maminiti kalongo-na-mahano,

malongo-na-ntāndàtu. Ngimba umwe mukubōmbágá ikyo? Kangi ngimba umwe mwisakubomba iki, igula indumbula yīnu? Lilino kumbikilaga iki une njobile. Komma ukukyitikisyá ikyene kigwege pa nyuma yāko, bo ga mīsi gikugwa pa nyuma ya lisekwa, mūmo ubuyobelo bwaiyolo buyilile. Komma ukubomba ikyo. Inogonela Iki.

¹⁵³ Linga une ngubabulaga umwe ikindu kilikyosa iki kikāya mu Lisimbo, kangi u lufingo lwa sala iyi, umwe mukufimbilisígwa ukwāgána nu ndongosi apa nukwisa ukumbula une ukufwana ni kyéne. Isyo kutalusya. Une—une ngumanyisya nakimo lōli iki kili mu Lisyu. Kangi linga une ngwisa kwimililaga itolo palapala pa Lisyu, kangi linga une nguyoba Ikyene kili mu njila yila, kangi Kyala... Ikyene kyo kili mu i Bāngéli. Linga u Gwandumi gwa Ntwa ālimbulíle une ikindukimo iki kikálímo mu i Bāngéli, ikyene kikābagíle ukuya Gwandumi gwa Ntwa. Uko ko kutalusya. Umwēne nasiku nakabalilo kamo akambülámo une kalikōsa lōli kāko kāli mu Lisyu lila, kangi umwe mukumbíkila une ubukéti. Umwene akayobámo siku akandu kamokene, ukufuma ku bamia ba maelifu na maelifu, kangi injobeló sya nkīsu, abōmbílemo Umwēne nasiku akabalilo kamokene ayōbíle kalikosa akasobi, pamó ayobílémo kalikosa aka kakálísíle ukuboneka.

¹⁵⁴ Pilikisya. Ndalusya u nkētesi na bala apa. Iki kyo iki umwe mwesa mukukēta apa, kyo lubafu lwabufündígwa ulwa kila. Ngimba ikyo kitalusye, bakundwe? [Aba bakundwe bikuyoba, “Kutalusya.”—Nsimbí] Fiki, panja pala, kangi panja mbūmi bwa pamwene-pamwene, kūko Umwēne ikuyoba, “Buka kula ku buyo *ubu*, kangi kēta *iki*. Kangi *iki* kisakukwisaga ukuboneka. Kangi yoba *iki* pa bwa apa, kubwa *kuno*.” Ikyéne itolo kingikingi, akabalilo kōsa, muketile, ikyinja ukwingila ni kusōka. Abāndu nkilundilo itolo bikukēta i—i ifindu ifinini. Lōli linga ugwe kuya gwakwiýisa.

¹⁵⁵ Lilino ngimba aligwesa mu lukindi lwa lwiputo, imile apa, nhesya kwa une? Fyusya amaboko ginu linga umwe muli. Umma ndaga. Balinga kula baliko kula, bamenye ukuti une ngamanya nakimo ikya ugwe? Fyusya ikiboko kyako. Lilino akabalilo kāko... Ndaga. Une ndikupasya kūko ugwe uliko, linga ugwe ulimmwanya mu mesa, kunyuma kifuki ni kibūmba, pāsi ukukinda *apa*, kulikōsa ugwe uliko. Une ngubukága uku...

¹⁵⁶ Lilino, iki kyo panongwa ya bununu bwīnu. Iki kyo panongwa ya bwīnóge bwīnu. Muketile, iki kyo panongwa ya bwīnóge bwīnu.

¹⁵⁷ Une ninogonaga ukuti yula āli mwisukulu gwāngu unnini ikuyoba kwa une akabalilo kāla, lōli umwēne akāli mma. Une ndinagwe u ndumiana-mwisukulu unnini muno pabuyopamo, ikilo iki, umwēne ntali bo ulu kangi une ninogonaga ukuti umwene yo Paul unnini. Umwēne akabalilo kōsa āyobaga

umwēne ikwīsaga, ukwīma pa kigémo, ukulūmbililíla une, kangi umwe akāya itolo kifuki fyinja fibili mbukusi. Une ngwinogona u ndumiana unnini yula ikufwima unna.

¹⁵⁸ Popāpo kumbukilága, une ngugéla ukubatūla umwe. Une... Kyāla amenye ikyo. Une ngugéla ukubatūla umwe, muketile. Lilino kēta, une ngulonda umwe ukwega ubunoge, linga Umwēne ikwisa pakati pa uswe.

¹⁵⁹ Lilino inogona isya iki, u Mundu ugwa Yeso Kristi ikubomba mu mbili, bo mūmo Umwene āfingile Umwene ikubombaga mmasiku gabumalikisy. Balinga bamenye ukuti Umwene āfingile ikyo? Itolo bo mūmo ukwēne kwāyilile pāsi pala ku Sodomu, akabalilo kāko u Gwandúmi ni nyuma Yāke yisindile, kangi i... Yula āli yo Kyāla. Ngimba ugwe kwitika ukuti yula ali yo Kyala? Balinga bikwitika yula āli yo Kyala? ["Ameni."] Naloli, ikyene kyāli. Ili Bāngéli lyāyobile ikyēne kyāli. Kangi Umwene, Yeso, alinkubagomokesya ku kyene. Lilino ketesya.

¹⁶⁰ Lilino umwe panja apa na makadi ga lwīpúto, une ngulōnda umwe ukubōmba ikindukimo kuli une, kulikosa umwe muliko. Lilino kumbukilága, ifindu ifi, kētésya akabalilo kāko Ikyēne kikukubūla ugwe ukuti ugwe ubumbulusígwe, pamo iki Ikyēne kikukubūla ugwe ikyakubōmba. Kētésya iki Ikyēne kikuyoba. Linga Ikyēne itolo kikukubūla ugwe, ikyo kyo kuyenga u lwītiko lwāko. Kangi polelo akabalilo kāko u lwītiko lwāko lukufika pa buyo, ugwe fikilaga itolo nukummwitikisa Kyāla. Umwene akaya yo une, panongwa yakuti Tata Gwakumwanya amenye.

¹⁶¹ Une nguketa pāsi ku lukindi ulu, une ndinkumbona umundu yumo uyu une nummenye. Une ngabagila ukukēta lōli kifuki abāndu babili pamo batatu nkilundilo kyōsa, aba une mbamenye. Kangi une ngamanya ukuya, lululu ulu, une mbagile ukuyoba, nāngisya yumo. Une nummenye ukuti Edmund Way āli apa amaminiti manini aga gakindile. Une ninogonaga une nālimbwéne umwene, kangi une—une mbondilwe...

¹⁶² Linga une ngasoba, une ngumbona umundu yumo une nummenye, yo nnyāmbála nu nkasi gwāke, kangi akalindwana akanini, ikukoleligwa Fritzinger, ukufuma kula mu Ohio. Ngimba yula, ngimba ugwe gwe Nku...yula Nkundwe Fritzinger? Ugwe gwitūgésye mu luko lwa mbusyungutílo ubunini kūko...Uyo yo Nkundwe na Kalumbu Fritzinger, ukufuma ku Ohio, abīnángu ba une.

¹⁶³ Kangi panja pa ikyo, itūgésye kunyuma kula, yo u... une ngukēta pa lubafu lwa kubwa kuno, yo nnyāmbála unkāngále ikubūka ku fyinja malongo-mahano-na mana-na-fibili mbukusi, ni ngāmu ya William Dauch. Umwēne nu nkasi. Unkasi yo nāsi. William Dauch, mu Ohio, u mwīnangu gwa pamwene-fiyo gwa une. Lululu ulu, umwēne āli, ni fyinja malongo-mahano-na-mana-na-kimokyene mbukusi, āli nu konangika kwa ndumbula ukumālisya, ukukomígwā kwa

ndumbula, kangi unkasi gwâke ālingôlîle une, ukwisa nakalinga, umwene āfwâga palapala pala. Kangi pa . . .

¹⁶⁴ Umwêne yo mwînângu gwa pandumbula kwa une. Pa nsebwe gwângu ukubûka ukunkéta umwêne, une nâpasyâga. Kangi une ndinkwîma, kangi limo mwa magurudumu gângu lyasôkilepo pa bubambe, une itolo natumulaga ilitayala lyângu ntumbakasya, kangi une nabûkîle kula ku bwîmîlo bwa Texaco, ndinkubika amafuta gâmo, kangi abêne bikwisa panja, ukukéta ku lyêne. Kangi une ndinkukéta pamwanya, kangi une ndinkumbona u Nkundwe Dauch ikwenda ukwisa ukukinda mu kipanga kyângu, ikuponia ikiboko kyângu. Une ndinkuti, “Atufyigwége u Ntwa.” Kangi une ndinkukéte kunyuma injila iyi, kangi apa umwe ikwisa pâsi pa lukindi, kangi ikuponia ikiboko kyângu. Une ndinkubûka ku mwêne.

¹⁶⁵ Une nâlimbwene u ngângâ gwâke, uNjuda unkeke, pamo ugwbukusi-bwapakati, unnyambala gwa kiJuda. Kangi une ndinkuti, “Ngimba bule umwene, ngângâ?”

¹⁶⁶ Alinkuti, “Umwêne akayanalo nu lusako lwakulwîla.” Alinkuti, “Umwêne ali pa kihema kya oksijini.” Alinkuti, “Umwene isakufwaga palapala itolo.” Umwene alinkuti, “Kumbukilaga, umwene ali ni fyinja malongo-mahano-nama.”

Une ndinkuti, “Ena, nkulumba.”

¹⁶⁷ Alinkuti, “Ukwene ko kutoligwa kwa ndumbula yôsa. Nakimo kibagile ukubombigwa.” Alinkuti, “Akene ko kabalilo ka kubûka.”

¹⁶⁸ Kangi une ndinkuti, “Ena, nkulumba. Loli, umma, umwene atikubûkâga mma. Ikyo kyo kyosa.”

¹⁶⁹ Une ndinkwingila, ukubûka ikiboko kyângu pâsi pa kihema. Une ndinkuti, “Nkundwe Dauch, ngimba ugwe ubagile ukumbilika une?” Umwene alinkukéta mmwanya kwa une. Lilino naloliloli, mu ngamu yâke, umwene yo gwa kiJeremani, D-a-u-g-h, kangi une nguyikôléla iyêne Dauch, muketile. Kangi une—kangi une ndinkubûka ikiboko kyângi pâsi pa kihéma, kangi une ndinkuti, “Ngimba ugwe kumbilika une, Nkundwe Dauch?”

Umwene alinkuti, “Ena.”

Une ndinkuti, “Ugwe utikubûka mma. Une ndalile ngubwene ugwe utikubûka mma.”

¹⁷⁰ Undungu ukufuma pala, imîle nkipanga kyângu, ywani ikwisa ikwenda ukusegelela ukukinda nkipanga lôli yu Nkundwe Dauch! Une ndinkusôkapo pa lukomano nukubûka kula ku kisôko, ku bulilo, ukwâkûlya. Kangi akabalilo kâko une nsôkîle ukufuma mu ligali, kangi nendaga ukufyuka u lukindi, apa ikwisa Nkundwe Dauch ni kiboko kyâke abâlwile panja. Imboniboni sila sitikutoligwa.

¹⁷¹ Kangi u nnyāmbala yula ugwa malongo-mahano-na-mana mbukusi, kangi ikukōngésya ulukomano lulilōsa, āli mu California. Ngimba ugwe ubagile ukufyusya ikiboko kyāko, Nkundwe Dauch? itugésye pala, ukuti abāndu bisakukētāga iki unsikali gwanaloliloli ali lilino. Apa, itugésye papapa apa, muketile, ifyinja malongo-mahano-na-mana-na-kimo mbukusi, kangi ukukōngésya ulukomano lulilōsa. Akabalilo kāko une ndi ku kipanga, umwene ikwendesyamamailosi mia yumo ilisiku lilyosa, ukumbilika une ngulumbilila akabulumbilili akanini, nukugomokela. Kyala, “Ukwene kwisakuyaga Bwelu nkabalilo ka namayolo.”

¹⁷² Une ndinkuti, ilisiku limo une nayobaga ku mwene, une ndinkuti, “Ngimba une mbagile ukubomba kiliku kwa ugwe, Nkundwe Dauch?”

¹⁷³ “Itolo ukusuma kumokwene, Nkundwe Branham. Akabalilo kako Umwene ikwisa, une ngulonda ukubuka nu Mwene.”

¹⁷⁴ Ndinkuti, “Komma ukupāsya. Ikyo kyo kiponesígwe. Naloli.” Lilino, u nnyāmbála isile nkati, ālyōsígwe, o, īsile mula kangi āambilile u lōsyo lwa Mbepo Mwikemo na filifyōsa, itolo uwgambombo gwa Kristi unnoge.

¹⁷⁵ Lilino une ngulālusyága aligwesa, naloliloli ukuyīndika, umwe kēta kubwa kuno kangi ipūta.

¹⁷⁶ Lilino balinga bamanyisi apa bamenye ukuti Umwēne yo Mpūti Nkulumba, lululu ulu, yyu abagile ukupalamasigwa nu bwipilike bwa bonywa bwitu? Ena, linga Umwene yo yuyo mmayolo, umusyugu, kangi bwilanabwila, kangi u Mputi Nkulumba, Umwene abagile ukubomba injila yilayila. Itolo, Umwene, umbili Gwake guli ku... pa Kikota kya Kyāla. Balinga basimenye isyo? [“Ameni.”] Umbili gwa Yeso guli pa Kikota kya Kyāla. Loli Umwene ikubombela imbombo umbili gwitu ukwināngísa Mwene, itolo mūmo Umwene āfingile ukubomba. “Imbombo isi Une ngubomba mwisakubombaga umwe numwe.”

Une ngubasumága umwe ukwitūgásya kimyemye, yaga bāluyīndiko, kētésya, ipūta.

¹⁷⁷ Lilino, Tāta Gwakumwanya, une ngelile ukuya itolo gwāluyīndiko mūmo une mmanyile akabombelo, ukufwana ni kyēne. Lilino itolo i lisyu ukufuma kwa Ugwe lilino, Ntwa, kangi polelo kaliyaga akākimyemye, a Kogo akanini kasulukege pāsi ukwisila mu kilundilo iki nukuti, “Ikyēne yo Une; komma ukutīla.” Tupaga ikyēne, Tāta. Kangi une ngwibíka nimwene kwa Ugwe, ni Ndumi iyi yilumbililígwé ikilo iki, ni Lisyu Lyāko ukuya lisisimikisígwe. Ugwe utikufimbilisigwa ukubomba ikyene. Loli linga Ugwe kubombaga ikyo, pamo Ugwe naloli kubomba ikyene, panongwa yakuti Ugwe gwāfingile. Une ngusuma ukuti Ugwe kupaga iki, mu Ngamu ya Yeso. Ameni.

¹⁷⁸ Kangi aligwesa naloliloli nuluyīndiko, itolo naloliloli nuluyīndiko. Mubōmbile ugwe? Lilino une ngukupágua ugwe i

Lisimbo bo uswe tukubūka mula. Linga u Ntwa ikubōmba, une ngamanya. Lōli itol... Kangi une ndumbilile bo ulo, muketile, ubo bo luko lumo ulwa bupakígwe. Ubu bo luko ulungi lwa bupakígwe. Lula lwāli itolo lusayo. Iki, itolo ikindu kimokyēne, itolo kikwēga u būmi itolo ukufuma mwa ugwe.

¹⁷⁹ Lilino unkikúlu imíle apa. Une ngambonamo siku mbūmi bwangu. Ngimba uswe tuli bahesyá? Une ngwitika ugwe uyobíle, akabalilo kanini aka kakindilepo, une ngākumenye ugwe. Kyala akumenye ugwe. Umwene ammenye une. Ngimba ugwe umenye ukuti iki uswe twimile apa lilino, uswe tukubūka ukufimbilisígwa ukwāmula panongwa ya ikyēne pa Lisiku lya Bulungi? [U kalumbu ikuyoba, "Ameni."—Nsimbí] Ugwe usimenye isyo? Ugwe umenye ukuti iki uswe tukubōmba lilino, Kyāla isakutendeka uswe ukwāmula panongwa ya kyéne kumwanya kula? Une njobile itolo ikyo panongwa yimo. Lilino, linga Untwa Yeso isakusetulaga kwa une iki ugwe kubomba, iki kili pa minogono gāko, pamo ikindukimo bo ikyo, ngimba ugwe ubagile ukwitika ikyene? Ugwe ubagile ukwitika ikyo, bule ugwe? ["Ameni."]

¹⁸⁰ Ngimba umwe mukwitika ikyene panja apo, umwe kilundilo?

¹⁸¹ Lilino uswe tukwīma itolo katikati bo yu nkikúlu pa kisiba, kangi u Ntwa gwītu, u nnyāmbála nu nkikúlu ukwāgána ku kabalilo kābo akākwānda. Muketile? Apa uswe tufikíle, ulukomano ku... Ikyo kyo Mwikemo Yohani untu gwa 4. Lilino linga u Mbepo Mwikemo ikuyobaga... Linga ugwe uli apa panongwa ya munduyumo uyungi, linga ugwe uli mbine, linga ikyēne kyo lutamio lwa ku kāya, linga ulwene lutamio lwahela, kilikyosa iki ikyene kili, une ngaya nayo ifundo. Loli Umwene ikubomba. Lōli Umwēne abagile ukumanya aminogono aga gali mu ndumbula yāko. Umwēne yo Lisyu. Une ngabagila. Une ne mündu. Ugwe uli itolo panandi gwālutende, kangi iyo yo nongwa une ngubōmba iki, ugwe uketíle.

¹⁸² Ulo lo lumo mwa ndamio syāko, lo lutende. Uko ko kutalusya. Kangi ugwe kāngi uli ni mbungo ya sukali, ikyo kyo kindu kinine iki kitamisyé na ugwe. Uko ko kutalusya. Ifufánio, itolo ifindu fíngi fitamisyé. Ngimba ikyo kitalusye? Linga ikyo kyo kitalusye, fyūsyá ikiboko kyāko. Muketíle? Ngimba ugwe kwitika Umwene ikubumbulusyaga ugwe? [Kalumbu, "Une ngwitika."—Nsimbí] Kwitika ugwe? Lilino, ulutende lwāko lutendekígwe ukufuma ku bukusi bwāko, muketile, lōli lilino ulo lōsa lukukulekágá ugwe. Kangi une ngwitika ukuti nu lwītíko uswe tukubükágá ku Kalvari, ukuya nu kusāmísya i Lilopa.

¹⁸³ Lilino, ikyo kyo katikati itolo iki Umwene ābombíle. Umwene ālimbulile unkikulu ku kisiba iki ulutamio lwāke lwāli. Abāke bo bāli banyāmbala bingi fiyo. Ikyāko kyāli fiki... Une ngwinogona kyāli lutende, kangi fibili pamo findu

fitatu ukongelelápó fitamisyé na ugwe. Uko ko katalusya, buli mukāmomumo? Ikyo kyo kindu kilakila.

¹⁸⁴ Lilino, akabalilo kako Umwene ālisíle kwa Simoni, Umwene alinkumbula umwene uyu umwēne āli. Ugwe kwitika Kyala abagile ukumbula une iki ingamu yāko yili? Ngimba ikyene kikukupela ugwe ukwitika ukongelelápó? Ikyene kikubōmbága? Nka. Strong...[Kalumbu ikuyoba, “Stout.”—Nsimbí] Stout, ngimba ugwe kwitikágá? Bükága nukwitika kangi ugwe... Ikyéne kimalike mōsa. Ameni.

¹⁸⁵ Isaga. Ugwe kwitika? Une kāngi ndinhesya kwa ugwe. Une ngakumanya ugwe. Kyala akumenye ugwe. Ngimba ugwe kwitika ukuti Umwene abagile ukusetula ku myangu iki lo lutamio lwāko? Kangi linga Umwene ikubōmba, polelo u Ntwa Kyala asayigwége. Ngimba isyo syabwanaloli? [Kalumbu, “Ena, ikyene kyo kyabwanaloli.”—Nsimbí.] Lilino komma—komma ukuya nukupásya, uketíle, uyu—uyu yo Mwēne, ukuti ugwe kwipilika ikyo. Umma ndaga. Ugwe kukubílwa kangi na kayílo kalutende, gwalutende mmulinogono, kangi ukuya nswanyuligwe mōsa nakalinga. Kangi ugwe kukibílwa nu lutamio lwa kayongo ikindukimo kitamisyé ni kínie, kangi ugwe uli nsitalilópa. Uko ko katalusya. Ugwe uli nakyo ikindukimo...

¹⁸⁶ Ukwene kukumilisyá ukuya nnyambala uyungi. Ngimba ugwe kwitika ukuti Kyala ikubumbulusyaga ugwe? [Kalumbu, “Ena, une ngammanya.”—Nsimbí] Ukubūmbulusya undumego, yópe, ukumpela umwēne ukuya kanunu? Ugwe kwinogona ulutamio lwa mündä lwisakukulekágá, kangi umwene isakuyaga kanunu? Ikyo kyo iki umwene ikukubílwa nakyo. Büká kabíke amaboko gāko pa mwene, mbūla umwēne lúlo, kangi ikyéne kisa—ikyéne kisa kundéka umwēne.

¹⁸⁷ Une ndi nhesya kwa ugwe. U Ntwa Yeso amenye uswe babili, ngimba Umwene ikubombaga? Ngimba ugwe kwitika ukuti Kyala abagile ukupela ugwe ueyege kanunu? Linga Untwa Yeso isakusetulaga kwa une ikindu iki kyo...iki ugwe gwe...ikyo kili mundumbula yako, ngimba ugwe kwitika ukuti Umwene ikukupelaga ugwe ueyege kanunu? Ugwe ufumile pakuya nu lutamio lumo. Ugwe uli nu—nu—nu lutamio lwa kayongo, kuli kindu kyākwánda. Kangi ikindu ikīngi, ikyéne kipelíle akayongo kāko ukuya nifilönda, lōli kyo iki u ngāngá gwāko āybóbile. Lilino, ikindu ikīngi kyo, ukuti abēne bikulönda ukupanja panongwa ya ikyo. Uko ko katikati katalusya. Ngimba ikyo kikaya kyābwanalóli? Lilino ngimba ugwe kwitika Umwēne abagile ukukilania ikyo? Ugwe kwinogona u lwítiko lwāko luli mwa Umwēne? Lilino ugwe umenye ukuti une nganya une ikubōmba ikyo. Ugwe kwitika? Umma ndaga. Büká, kangi mūmo ugwe gwítikile, momūmo kiyége ikyéne kwa ugwe.

¹⁸⁸ Uswe tuli bahesyá yumo kunnine, une ngusakikisyá. Untwa

Kyala amenye uswe twesa bibili. Ngimba ugwe kwitika Umwene abagile ukusetula ku myangu iki kibagile ukukutula ugwe? [Kalumbu ikuyoba, “Ena, une mmenye ikyene.”—Nsimb] Ugwe, ugwe kwitika Umwene ikubombaga. [“Sisimikisyé.”] Une nguti . . . “Sisimikisyé,” ikyo kyo kinunu fiyo. Ikyo kinoge fiyo. Lilino ugwe uli ni findu fingi fiyo fitamisyé na ugwe, ifufáni sinyingi fiyo ni findu, kangi ukukosomola ngati, kangi ugwe ukabagila ukusokamo mu kwene. Kangi ugwe naloliloli gwe gwalutende. Kangi—kangi ikyo, ikyo ko kutalusya.

¹⁸⁹ Polelo, ugwe uli nu busito pa ndumbula yako, kangi ubusito ubo bo bwa munduyumo, uyu yo mwanundumiana gwako. Kangi umwene ali nu—nu lutamio, ulutamio lwa ku kaya. Umwene nu nkasi gwake, abene akabalilo kosa ukumanana nukindilila . . . ? Kangi ugwe uli nako ubusito ikyene. Uko ko kutalusya. Lilino ugwe kwitika ni ndumbula yako yosa, kangi ikyene kisakuswepukaga mosa nukusokapo. Ugwe kwitika lilino. U Ntwa akusaye ugwe.

¹⁹⁰ Ngimba ugwe ubombile, nkulumba? Une ndi nhesya kwa ugwe, kangi—kangi ugwe gwe nhesya kwa une. Kangi ikyene kyo—ikyene kyo kikwanda . . . Imboniboni lilino, une nguketa, kikuboneka ngati inyumba yosa yikweluka itolo, ngati luko lwa kafulafumbi—ngati ukusyungutila. Uketile? Loli ngimba ugwe kwitika ukuti u Ntwa Yeso isakusetulaga kwa une iki ugwe gwimile apo? Ugwe kwitika ukuti Umwene ikubombaga? Une ngwitika ikyo, nene. Une nguyoba itolo kwa ugwe, ukulunganisania i mbepo yako, katikati kyo iki une ngubombela ikyene. Muketile, une ngakumanya ugwe, polelo ikyene kyo kindukimo ikingi palubafu pa une. Une ngufimbilisiga ukwiyega nimwene itolo fiyo ukwisosyapo ukumalisya ukufuma kwa nimwene, ukuti Umwene abombe ikyene Mwene. Ugwe kupilikisya?

¹⁹¹ Lilino, ikindu kimokyene, ugwe kukubilwa na kayilo akabibi ka bwitugasye bwa lutende, kangi akayilo ka lutende aka kalimo ku kababilo kamo. Uko ko kutalusya. Kangi akayilo ka lutende aka katendike ugwe ukuya nu kukuya kwa lilopa ukwapamwanya, kope. Kangi ugwe gwali nu kusililika. Ikyo kyo ikyene. Tuyobe, ugwe pamo gwali ndumbilili, pamo uli ndumbilili. Lilino ugwe uli ndumbilili; une nguketa ugwe kwima pa kigemo. Polelo, yaga nu lwitiko mwa Kyala, kangi u lutende lula lwisakukulekaga ugwe. Abalumbilili bosa balinakyo ikyo. Ugwe kwisakuyaga kanunu mosa. Gomokela ku kigemo kyako, kangi mpilikila Kyala nukwitugasya gwabwanaloli ku Lisyu lila, Yeso Kristi.

¹⁹² Ugwe kwitika ulutamio lwako lwa nyuma lwakulekile ugwe, gwitugasye nnikota? Ngimba ugwe kwitika ikyene? [U kalumbu ikuyoba, “Ena.”—Nsimb] Umma ndaga, nkulumba, polelo kindililaga itolo, kuyoba, “Ndaga Ugwe, Ntwa.”

¹⁹³ Isaga, nkikulu. Ngimba ugwe ubōmbile? Ugwe kunyitika une ukuya ntumigwa gwa Kyala? [Kalumbu ikuyoba, “Naloliloli ngubomba.”—Nsimbil] Umma ndaga. Ngimba ugwe kwitika ulutamio lwa bakikulu lula, ulutamio lwa bukikúlu, lo lukukulekága ugwe? [“Ameni.”] Ugwe kwitika? Polelo kindililaga, yobaga, “Ndaga Ugwe, Ntwa.”

¹⁹⁴ Ulutamio lwa lufigo, ulutamio lwa nyuma, ku nyuma yāko. Ngimba ugwe kwitika ukuti Kyala ikukubumbulusyaga ugwe nukukupela ugwe ukuya kanunu, ukufuma ku ikyo? Ugwe kwitika ukuti Umwene ikukupelaga ugwe uyege kanunu? Syosa silikanunu, ega nkyeni mwako...?...

¹⁹⁵ Isaga, nkíkúlu. Une ndi nhesya kwa ugwe. Linga une ngāyobíle nakimo kwa ugwe, na panandi, ngimba ugwe ubagile ukwitika ukuti u Kuyapo kwa Kyala kuli apa ukubumbulusya ababíne? [Kalumbu ikuyoba, “Naloliloli, une ngwitika ikyene.”—Nsimbil.] Ugwe ubagile? Ena, linga ugwe kubomba, ulutamio lwako lwa mündä...Une mmalíle ngubülíle ugwe, ugwe uketile. Ikyene kyo—ikyene kibukile. Une ngubulile ugwe, muketile.

¹⁹⁶ Ngima ubōmbile ugwe, nkulumba? Kyāla ikwitugasya mu ndumbula. Kangi i ndumbula yāko yināngisyága pamwanya apa lululu ulu, nnyali. Ngimba ugwe kwitika ukuti Umwene isakupelaga iyene ukuya kanunu? Kindililaga kangi itikaga ikyene. Kyala akusaye ugwe. Ugwe kwitika; Umwene isakupelaga iyene ukuya kanunu.

¹⁹⁷ Ugwe uli nuluténde, yikupelíle ugwe ukuya nu lutamio lwa mündä, ikilönda kya māla. Ikyēne kikukutamia ugwe ukufuma pa kulya. Ugwe kwitika ikyēne kisōkílémó kyōsa lilino? Büka kiyēgélé gwimwene ikindukimo ikya kulya.

¹⁹⁸ Luko lwa bukafu kuli ugwe ukusumuka, inyuma yikukutamia ugwe mbubibi fiyo. [U mbine ikuyoba, “Ena, nkulumba.”—Nsimbil] Iyēne yitikukutamiaga ugwe kangi mma, linga ugwe kwitikaga ikyēne. Ngimba ugwe kubombaga? [“Ena, nkulumba.”] Fyosa filikanunu, kindililaga, kangi u Ntwa Yeso ikukupelaga ugwe ukuya nnunu lōsa.

¹⁹⁹ Ngimba ugwe gwe gwaluténde fiyo fiki? Itolo kindililága, yobaga, “Une ndikuyaga gwäluténde kangi mma,” kangi ugwe utisakuya. Bükágá nukwítíka. Umma ndaga, nkulumba.

²⁰⁰ Lilino, nkikulu. Lilino, unkíkúlu gwa kiItiopia, kangi unkíkúlu umwelu, itolo katikati ngati ikindukimo ngati ikyo bālyágéme mulisiku lila, Yeso. Abēne bāli nukwipagulanía mūmo abēne bālísibíle ukuya nakyo Kwitongo, lōli uswe tukaya nakyo ikyēne kangi mma. Yeso abātendíke abēne bamanye ukuti abāndu bōsa bāli bāndu ba Kyāla. Kukálipo ukukindana nakumo, muketile, kali umwēne áli n’Juda pamo m’Samaria.

²⁰¹ Lilino, linga Kyāla atikukutúla ugwe, nakalinga lululu ukutupa kwa fifupa kula kwisakukulemasyaga ugwe mōsa. Ngimba ugwe kwítíka Umwēne ikukutülága ugwe, ukupela

ugwe uyege kanunu? Itolo bo yu nkīkúlu ābōmbíle, būka pa nsebwe gwāko kangi bābúla abāndu bāko ikindu ikikulumba kiliku iki Kyāla akubōmbíle ugwe. Umma ndaga.

Lilino, alipo umpanji itendekísyé ukusōsya panja ikimāge.

²⁰² Itolo pa kabalilo. Ikyēne kikāli nkīkúlu uyu mma. Lilino, akabalilo kanandi itolo, aligwesa nuluyindiko lilino. Yo—yo Setano, ikugela ukubomba ikindukimo. Apa ikyene kili. Lyulu lya kansa, lyulu lya kansa, babili-mwesa ba umwe. Uko ko kutalusya. Ugwe uli ni lyulu lwa kansa, umwene ali ni lyulu lya kansa, kangi u mōhesi uyu ikuywega ikukōléla ku butuli ukufuma kimo ku kinine. Lōli Mbepo Mwīkemo ikuywega, yópe. Ywani ugwe kumwitikága, Umwene? Umma ndaga. Sumuka ukufuma nkatala ako, nkīkúla. Sumuka ukufuma pa kitala ikyo. Sokámo ukufuma mu ikyo. Bükága, itika Umwēne lilino. Ameni.

²⁰³ Ngimba umwe mukwitika? Fyosa ifindu fibagile. Ngimba umwe mukwitika? Ngimba bule umwe mu kilundilo?

²⁰⁴ Unko uswe twīme pa malundi gitu lilino. Lululu ulu ko kabalilo ukubomba ikyene. Unko umundu aligwesa... Kyala akusaye ugwe. Unko umundu aligwesa pa malundi gako itolo lilino. Mpaga Kyala ulutufyo. Fyusya amaboko ginu.

²⁰⁵ Ndaga Ugwe, Ntwa Yeso! Uswe tukukutufya Ugwe panongwa ya bukulumba Bwāko, kangi ukubümbulúsya Kwāko kwa babine. 

64-0307 U Bukéti Pa Sūmbi
Tempeli Ya Soul's Harbor
Dallas, Texas U.S.A.

KYANGONDE

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimini, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org